

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI KHAMIS : 1 NOVEMBER 2018

SOALAN NO: 1

PEMBERITAHUAN PERTANYAAN BAGI JAWAPAN LISAN

MESYUARAT KEDUA PENGGAL PERTAMA,

PARLIMEN KEEMPAT BELAS,

MAJLIS MESYUARAT DEWAN RAKYAT

PERTANYAAN : LISAN

TARIKH : 1 NOVEMBER 2018

SOALAN :

Y.B TUAN CHA KEE CHIN [RASAH] minta **MENTERI TENAGA MANUSIA** menyatakan apakah rasional di sebalik keputusan Kerajaan yang menetapkan gaji minima pada paras RM1,050 sahaja baru-baru ini, yang dilihat sebagai 'terlalu rendah'.

PR-1412-L02342

PERTANYAAN : LISAN

TARIKH : 12 NOVEMBER 2018

SOALAN :

Y.B TUAN KESAVAN A/L SUBRAMANIAM [SUNGAI SIPUT] minta **MENTERI TENAGA MANUSIA** menyatakan kenapa gaji minimum kebangsaan ditetapkan pada RM1050 sebulan dan bagaimanakah kepentingan pihak-pihak berkenaan telah diambil kira. Bagaimanakah paras ini akan dinaikkan kepada RM1500 sebulan dalam lima tahun?

PR-1412-L01843

PERTANYAAN : LISAN

TARIKH : 27 NOVEMBER 2018

SOALAN :

Y.B TUAN SABRI BIN AZIT [JERAI] minta **MENTERI TENAGA MANUSIA** menyatakan mengapakan Kerajaan menaikkan kadar gaji minimum hanya sebanyak RM50 sedangkan janji Manifesto Kerajaan Pakatan Harapan ialah RM1500.

PR-1412-L01749

JAWAPAN

Tuan Yang Dipertua,

1. Terlebih dahulu saya memohon izin Tuan Yang Di Pertua untuk menjawab pertanyaan YB Rasah pada hari ini, 1 November 2018, bersama pertanyaan YB Sungai Siput pada 12 November 2018 dan pertanyaan YB Jerai pada 27 November 2018 kerana ia berkaitan isu yang sama iaitu bayaran gaji minima.

Tuan Yang Di Pertua,

2. Kerajaan memutuskan buat pertama kalinya untuk menyeragamkan kadar gaji minimum bagi seluruh negara pada kadar RM1,050 sebulan. Ini adalah sepertimana yang telah kami janjikan dalam Manifesto Pakatan Harapan semasa Pilihan Raya Umum ke-14. Kerajaan sedar ini memberi peningkatan sebanyak RM50 sahaja bagi Semenanjung Malaysia tetapi bagi negeri Sabah, Sarawak dan Wilayah persekutuan Labuan ianya memberi peningkatan yang tinggi iaitu sebanyak 14% atau RM130 sebulan.

3. Sebarang perubahan hanya akan dibuat melalui kajian semula perintah gaji minimum yang secara amalnya akan dibuat sekurang-kurangnya sekali dalam tempoh 2 tahun selaras dengan peruntukan Akta Majlis Perundingan Gaji Negara 2011 (Akta 732).

Tuan Yang Dipertua,

4. Dalam membuat semakan semula Perintah Gaji Minimum, pelbagai faktor diambil kira termasuk indikator-indikator sosio-ekonomi iaitu antaranya perubahan indeks harga pengguna, kadar pertumbuhan produktiviti, gaji penengah (keupayaan majikan untuk membayar gaji), kadar pengangguran, pendapatan garis kemiskinan dan sebagainya. Di samping itu, Kerajaan turut mengambil pendekatan “*balance approach*” bagi memastikan keseimbangan manfaat dapat dinikmati oleh semua pihak. Oleh yang demikian, Kerajaan yakin dalam tempoh 5 tahun pentadbiran Kerajaan Pakatan Harapan, peningkatan gaji minimum kepada suatu kadar yang munasabah akan berjaya dicapai.

5. Kerajaan maklum bahawa kadar kenaikan gaji minimum ini tidaklah terlalu tinggi, namun semua pihak perlu melihat keputusan ini dari perspektif yang lebih luas. Rasional keputusan Kerajaan adalah seperti berikut:

- (i) Bagi mengelakkan peningkatan kos operasi secara mendadak kepada majikan terutama kepada Industri Kecil dan Sederhana (IKS). Peningkatan mendadak kadar gaji minimum akan meningkatkan kos operasi majikan terutama aspek sumbangan caruman KWSP, PERKESO serta pembayaran bagi kerja lebih masa, kerja pada cuti umum, hari rehat dan sebagainya;

- (ii) Penetapan kadar gaji minimum ini adalah hanya sebagai gaji lantai sahaja. Ini bermakna pekerja/kesatuan sekerja dan majikan bebas berunding bagi penetapan gaji dan faedah-faedah lain yang lebih baik kepada pekerja;
- (iii) Ini adalah langkah awal dalam usaha Kerajaan meningkatkan taraf sosio-ekonomi penduduk di Sabah, Sarawak dan Wilayah Persekutuan Labuan. Ini akan membawa kepada pengurangan jurang sosio-ekonomi di antara mereka dengan penduduk di Semenanjung Malaysia sekali gus menggalakkan penstrukturan semula dan keseimbangan ekonomi di seluruh negara.
- (iv) Ia adalah peningkatan yang munasabah dan tidak membebankan 90% majikan yang terdiri daripada sektor industri kecil dan sederhana (IKS) di negara ini. Selain itu, perlu diambil kira ekonomi negara berkembang pada kadar yang lebih perlahan iaitu hanya 4.5% pada Suku ke-2 2018 berbanding 5.4% pada Suku Pertama, 2018; dan
- (v) Melindungi daya saing negara. Kenaikan kadar gaji minimum yang terlalu tinggi dikhuatiri akan memberi kesan kepada kemasukan pelaburan asing (FDI). Kerajaan juga perlu memastikan pelabur sedia ada terus kekal beroperasi di Malaysia. Pelaburan langsung asing (FDI) mencatatkan aliran masuk bersih yang lebih rendah sebanyak RM2.8 bilion pada

suku kedua, 2018 berbanding RM12 bilion pada suku pertama, 2018.

Tuan Yang Dipertua,

6. Sepertimana kita sedia maklum, dasar gaji minimum hanyalah salah satu dasar intervensi Kerajaan. Terdapat banyak dasar-dasar lain yang akan disediakan oleh Kerajaan bagi membantu golongan masyarakat terutamanya kumpulan B40 di negara ini. Kadar gaji minimum yang ditetapkan oleh Kerajaan iaitu RM1,050 mulai 1 Januari 2019 hanyalah sebagai “*floor wages*” sahaja yang mana pekerja di sektor swasta tidak boleh dibayar gaji pokok kurang daripada kadar tersebut. Oleh itu, majikan dan pekerja atau kesatuan sekerja bebas untuk berunding bagi penetapan gaji pokok dan faedah-faedah lain yang lebih tinggi.

7. Kesimpulannya, Kerajaan membuat keputusan ini bukanlah atas sebab-sebab yang tidak munasabah. Tetapi melihat semua aspek dan secara holistik. Ini kerana Kerajaan ingin memastikan semua pihak mendapat manfaat dan tidak terjejas susulan keputusan yang dibuat. Oleh itu, Kerajaan menyeru rakyat agar memahami dan melihat keputusan ini dari sudut yang lebih besar dan tidak terlalu bersentimen seolah-olah Kerajaan menafikan hak pekerja dan memenangkan pihak majikan atau terlalu menumpukan proses pemulihan ekonomi negara semata-mata.

PEMBERITAHUAN PERTANYAAN
MESYUARAT KEDUA, PENGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

**DARIPADA : YB DATO' SRI DR. HAJI ISMAIL BIN
MOHAMED SAID [KUALA KRAU]**

TARIKH : 1 NOVEMBER 2018 (KHAMIS)

SOALAN:

Dato' Sri Dr. Haji Ismail bin Mohamed Said [Kuala Krau] minta **PERDANA MENTERI** menyatakan tentang usaha Kerajaan bagi menyekat perkembangan ajaran Syiah di negara ini. Apakah tindakan Kerajaan kepada sesetengah golongan yang berani mempromosi doktrin Syiah secara terbuka seperti yang berlaku di Bukit Bintang dan telah tular di media sosial.

JAWAPAN : **(YB DATUK SERI DR MUJAHID YUSOF,
MENTERI DI JABATAN PERDANA MENTERI)**

Tuan Yang Di-Pertua,

Saya mohon izin untuk menjawab pertanyaan ini serentak dengan pertanyaan oleh **YB Pengkalan Chepa pada 1 November 2018 soalan No.29, YB Kuala Kangsar pada 4 Disember 2018 soalan No. 41 dan YB Ketereh pada 4 Disember 2018 soalan No. 46** , kerana menyentuh isu yang sama iaitu berkaitan usaha kerajaan menangani isu syiah di Malaysia.

NO. SOALAN: 2

Kerajaan sentiasa peka dan memandang serius terhadap penyebaran mana-mana doktrin yang menyeleweng daripada Ahli Sunnah Waljamaah termasuklah fahaman Syiah.

Muzakarah khas Jawatankuasa Fatwa Majlis Kebangsaan Bagi Hal Ehwal Agama Islam yang diadakan pada 2 dan 3 Mei 1996 antara lain telah bersetuju menetapkan bahawa umat Islam Malaysia hendaklah hanya mengikut ajaran Islam yang berasaskan pegangan Ahli Sunnah Waljamaah dari segi akidah, syariah dan juga akhlak.

Keduanya, memperakukan bahawa ajaran Islam yang lain daripada pegangan Ahli Sunnah Waljamaah adalah bercanggah dengan hukum syarak dan undang-undang Islam dan dengan demikian penyebaran apa-apa yang lain daripada pegangan Ahli Sunnah Waljamaah adalah dilarang.

Keputusan Jawatankuasa Fatwa Majlis Kebangsaan ini kemudiannya telah disusuli dengan fatwa pengharaman Syiah di 13 buah negeri di Malaysia dan fatwa ini telah pun diwartakan serta boleh digunakan untuk mengambil tindakan ke atas pengikut Syiah.

Sebagai contoh, di peringkat Wilayah Persekutuan, Pelanggaran terhadap fatwa yang telah diwartakan berkaitan pengaruh *Syiah* ini merupakan suatu kesalahan di bawah seksyen 4 Akta Kesalahan Jenayah Syariah (Wilayah-Wilayah Persekutuan) 1997 [Akta 559] berkaitan kesalahan aqidah. Seksyen 4 (1) tersebut memperuntukkan bahawa mana-mana orang yang mengajar atau menjelaskan apa-apa doktrin atau melaksanakan apa-apa upacara atau perbuatan yang berhubungan dengan agama Islam di mana-mana tempat, sama ada tempat persendirian atau tempat awam, adalah melakukan suatu

NO. SOALAN: 2

kesalahan jika doktrin atau upacara atau perbuatan itu berlawanan dengan Hukum Syarak atau mana-mana fatwa yang sedang berkuat kuasa di Wilayah Persekutuan, dan apabila disabitkan boleh didenda tidak melebihi lima ribu ringgit atau dipenjarakan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu. Selain itu, peruntukan seksyen 9 Akta Kesalahan Jenayah Syariah (Wilayah-Wilayah Persekutuan) 1997 [Akta 559] berkaitan kesalahan menghina atau mengingkari pihak berkuasa agama juga adalah berkaitan.

Sehubungan itu, bagi membendung ajaran Syiah daripada menular dan juga mempengaruhi umat Islam di negara ini, antara langkah-langkah yang telah dan sedang diambil oleh kerajaan ialah:

- (i) menyebarkan fatwa-fatwa yang telah dibuat tentang pengharaman Syiah menerusi poster, risalah dan pamflet mengenai bahaya Syiah;
- (ii) sesi penjelasan melalui program-program ceramah, media cetak dan elektronik;
- (iii) program pemantauan dan pengawalan bahan-bahan media cetak dan elektronik;
- (iv) meningkatkan kerjasama antara agensi keagamaan dengan agensi keselamatan dan penguatkuasaan yang berkaitan;
- (v) Bahan penerbitan yang jelas mempromosi ajaran Syiah akan diperaku untuk dikenakan Perintah Larangan (PL) oleh Kementerian Dalam Negeri. Perakuan PL bersandarkan kepada

NO. SOALAN: 2

keputusan Muzakarah Majlis Kebangsaan Bagi Hal Ehwal Ugama Islam Malaysia dan Jawatankuasa Fatwa Negeri.

Sesungguhnya kerajaan sentiasa bersikap profesional dalam mengambil tindakan terhadap mana-mana pihak yang dituduh terlibat dengan ajaran Syiah. Hanya mereka yang mempunyai bukti kukuh terlibat dengan ajaran Syiah sahaja yang diambil tindakan dan didakwa di mahkamah. Tindakan boleh diambil oleh Jabatan-jabatan Agama Islam berasaskan akta ataupun Enakmen Jenayah Syariah Negeri masing-masing.

Berhubung tindakan sesetengah golongan yang berani mempromosi doktrin Syiah secara terbuka, Jabatan Agama Islam Wilayah Persekutuan (JAWI) telah menerima maklumat berkaitan program yang dijalankan oleh sebuah badan bukan kerajaan (NGO), Who Is Hussain? pada 22 September 2018 (Sabtu) melalui aduan awam dan laman media sosial.

Pemantauan JAWI mendapati NGO ini menyebarkan risalah yang mempromosikan perjuangan dan keperibadian Saidina Hussain RA yang merupakan cucu kepada Nabi Muhammad SAW.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KESAVAN A/L SUBRAMANIAM
[SUNGAI SIPUT]**

TARIKH : 1 NOVEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan:

- a) adakah Kementerian akan mempromosikan lebih giat lagi mengenai Jambatan Victoria (*Victoria Bridge*) di Karai, Sungai Siput yang kini menjadi daya tarikan pelancong dari dalam dan luar negara; dan
- b) apakah usaha Kementerian untuk menaik taraf keadaan jambatan tersebut agar lebih menarik dan dalam keadaan baik di samping mengekalkan keunikan dan keaslian pembinaan jambatan tersebut bagi menarik lebih ramai pelancong melancong ke Sungai Siput memandangkan bersempadan dengan daerah Kuala Kangsar.

JAWAPAN :

Tuan Yang di-Pertua,

Untuk makluman Ahli Yang Berhormat, Kementerian Pelancongan, Seni dan Budaya melalui Tourism Malaysia (TM) sedia maklum akan potensi Jambatan Victoria atau *Victoria Bridge* di Karai, Sungai Siput yang merupakan antara jambatan keretapi tertua di Malaysia yang menghubungkan Perai hingga ke Johor Bahru. Jambatan ini dibina pada tahun 1897 dan dibuka secara rasmi pada 1900 dengan kos bernilai RM 325 ribu ketika itu. Kini ia menjadi salah satu daya tarikan pelancongan warisan dari dalam dan luar negara untuk mengunjungi pekan Karai.

Kementerian ini melalui Jabatan Warisan Negara telahewartakan jambatan ini sebagai tapak warisan di bawah Akta Warisan Kebangsaan 2005 (Akta 645) pada tahun 2016 atas signifikan warisan dan sejarah kepada negara.

Tuan Yang di-Pertua,

Di antara inisiatif-inisiatif yang telah dilaksanakan oleh TM untuk mempromosikan Jambatan Victoria adalah seperti yang berikut:

1. Melalui pelaksanaan program *Mega-Fam (Mega Familiarization)* dengan mempelawa wakil-wakil media dan para pengusaha pelancongan antarabangsa untuk menyertai acara dan program pelancongan supaya ianya dapat dipromosikan di dalam dan luar negara;
2. Bekerjasama dengan 12 buah agensi pelancongan di Malaysia bagi membangunkan pakej-pakej pelancongan ke Kuala Kangsar merangkumi lawatan ke Jambatan Victoria dan menerbitkan risalah *Kuala Kangsar Packages*;
3. Pada 02 Oktober 2018, TM turut bekerjasama dengan Tourism Perak Management Berhad (Tourism Perak) dengan mengadakan lawatan ke produk pelancongan yang terdapat di Kuala Kangsar dan Sungai Siput, termasuk ke Jambatan Victoria. Lawatan ini

NO. SOALAN : 3

telah disertai oleh YB Tuan Tan Kar Hing, Exco Pelancongan, Kesenian dan Kebudayaan Negeri Perak yang juga wakil-wakil media dan agensi pelancongan tempatan; dan

4. Menyebarkan maklumat mengenai produk pelancongan negeri kepada pelancong melalui Pejabat TM Luar Negara, Pejabat TM Wilayah dan 22 buah Pusat Penerangan Pelancongan (TIC) di seluruh negara serta melalui laman web TM dan media sosial seperti *Facebook* dan *Instagram*.

Kementerian Pelancongan, Seni dan Budaya melalui TM terus komited dalam melaksana dan mempelbagaikan usaha promosi pelancongan bagi menarik kedatangan pelancong ke Malaysia khususnya Negeri Perak dan sentiasa bekerjasama dengan Kerajaan Negeri serta penggiat industri pelancongan tempatan dalam mempromosi produk, perkhidmatan dan acara pelancongan.

Tuan Yang di-Pertua,

Kementerian sentiasa memberi perhatian kepada produk-produk pelancongan yang berpotensi untuk dibangunkan atau dinaiktaraf. Sehubungan dengan itu, Kementerian sangat mengalu-alukan sebarang cadangan daripada Ahli Yang Berhormat demi memajukan produk-produk pelancongan khususnya di Sungai Siput, Perak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA, PARLIMEN KEEMPAT
BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD
RAMLI
[DUNGUN]**

TARIKH : 01 NOVEMBER 2018 (KHAMIS)

SOALAN NO. 4

Minta **MENTERI PENGANGKUTAN** menyatakan jumlah pampasan yang telah dibayar kepada syarikat swasta yang menjadi pengendali Sistem Penguatkuasaan Automatik (AES) setelah diambil alih oleh JPJ.

JAWAPAN

Yang di-Pertua,

1. Untuk makluman Dewan yang mulia ini, Kerajaan dalam tahun 2012, telah melancarkan projek AES (dijenamakan semula kepada AwAS pada tahun 2017) dengan pelantikan syarikat Beta Tegap Sdn Bhd (BT) dan A.T.E.S. Sdn Bhd (ATES) secara penyumberluaran (*outsourcing*) bagi membangun dan mengoperasi projek berkenaan. Kontrak perjanjian asal dengan syarikat A.T.E.S. Sdn Bhd (ATES) telah berkuatkuasa mulai 9 Disember 2011 dan tamat pada 26 Ogos 2017. Kontrak dengan syarikat A.T.E.S. Sdn Bhd (ATES) telah disambung sebanyak dua kali iaitu pada 27 Ogos 2017 sehingga 26 Februari 2018 dan pada 27 Februari 2018 sehingga 26 Ogos 2018.

NO. SOALAN: 4

2. Kontrak perjanjian asal dengan syarikat Beta Tegap Sdn Bhd (BT) pula telah berkuatkuasa mulai 9 Disember 2011 dan tamat pada 31 Ogos 2017. Kontrak dengan syarikat Beta Tegap Sdn Bhd (BT) telah disambung sebanyak dua kali iaitu pada 1 September 2017 sehingga 28 Februari 2018 dan pada 1 Mac 2018 sehingga 31 Ogos 2018.
3. Semenjak dari mula pelaksanaannya, projek ini telah mendapat maklum balas yang amat negatif daripada orang ramai. Apabila Pakatan Harapan diberi mandat oleh rakyat Malaysia untuk membentuk Kerajaan baharu dalam bulan Mei yang lalu, semua terma-terma dan syarat perjanjian konsesi AWaS telah diteliti semula. Hasil dari penelitian ini, Kerajaan Pakatan Harapan mendapati model konsesi AWaS tersebut tidak memberikan manfaat bersih kepada Kerajaan dan terma-termannya amat berat menyebelahi kedua-dua syarikat.
4. Justeru, atas kepentingan negara dan rakyat Malaysia, Kerajaan telah memutuskan untuk membiarkan kedua-dua Perjanjian Konsesi AwAS antara Kerajaan Malaysia dengan Beta Tegap Sdn Bhd dan AES Sdn Bhd luput dengan sendirinya (*natural death*), masing-masing pada 26 Ogos 2018 dan 31 Ogos 2018. Mulai tarikh tersebut dan selari dengan klausa-klausa perjanjian, kesemua aset dan operasi AWaS telah diambilalih oleh Kerajaan. Operasi AwAS kini dilaksanakan sepenuhnya oleh Jabatan Pengangkutan Jalan (JPJ).

5. Bagi menjawab soalan **YB Dungun**, kerajaan pada masa ini sedang berbincang dengan syarikat terbabit mengenai isu-isu berbangkit akibat dari peluputan perjanjian tersebut termasuk isu pampasan yang dikemukakan syarikat. Setakat semasa, Kerajaan masih lagi dalam proses meneliti jumlah pampasan yang telah dituntut oleh pihak syarikat. Perbincangan di antara pihak Kementerian Pengangkutan, Kementerian Kewangan, Jabatan Peguam Negara dan Lembaga Tabung Angkatan Tentera (LTAT) telah diadakan sebanyak tiga kali setakat ini. Dalam perbincangan yang terkini pada 26 Oktober 2018, semua pihak telah bersetuju supaya tuntutan akhir daripada LTAT dipanjangkan kepada Kementerian Kewangan untuk diteliti secara terperinci dengan melihat segala elemen kos yang telah dikemukakan. Dalam hubungan ini, Kementerian Kewangan akan membuat penelitian secara terperinci dan akan memberi cadangan kepada pihak Kerajaan mengenai apa-apa sahaja kaedah penyelesaian ke atas tuntutan yang telah dikemukakan oleh LTAT. Proses ini dijangka akan dimuktamadkan sebelum akhir tahun 2018. Perkembangan akhir mengenai perkara ini akan diumumkan sebaik sahaja diluluskan oleh pihak Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH
BIN MOHD. NASIR [JOHOR BAHRU]**

TARIKH : 1 NOVEMBER 2018 (KHAMIS)

SOALAN NO.5

Minta **MENTERI PENDIDIKAN** menyatakan jumlah peminjam dan jumlah pinjaman PTPTN sehingga Jun 2018 serta anggaran pinjaman PTPTN yang akan dikeluarkan kepada peminjam baru setiap tahun sehingga tahun 2023.

JAWAPAN

Tuan Yang di-Pertua,

Terdapat **empat belas (14)** pertanyaan lagi yang berhubung kait dengan pertanyaan nombor 5 Perbadanan Tabung Pendidikan Tinggi Nasional (PTPTN) hari ini. Oleh itu, izinkan saya menjawab pertanyaan ini serentak dengan pertanyaan daripada:

- (i) YB Sekijang pada hari ini;
- (ii) YB Tanjong Malim pada 12 November 2018;
- (iii) YB Arau pada 13 November 2018;
- (iv) YB Bera pada 19 November 2018;
- (v) YB Kuala Krau pada 22 November 2018;
- (vi) YB Kota Samarahan pada 26 November 2018;
- (vii) YB Lipis pada 27 November 2018;
- (viii) YB Lenggong pada 28 November 2018;
- (ix) YB Bukit Bintang pada 3 Disember 2018;
- (x) YB Kepala Batas pada 4 Disember 2018;
- (xi) YB Pasir Gudang pada 5 Disember 2018;
- (xii) YB Jerantut pada 5 Disember 2018;
- (xiii) YB Kota Tinggi pada 6 disember 2018; dan
- (xiv) YB Padang Besar pada 10 Disember 2018.

Untuk makluman Ahli Yang Berhormat, sehingga September 2018, seramai 2,963,345 orang telah diluluskan pinjaman pendidikan Perbadanan Tabung Pendidikan Tinggi Nasional (PTPTN) dengan jumlah yang telah dikeluarkan sebanyak RM54.37 bilion. Peruntukan dana yang diperlukan untuk tujuan pengeluaran pinjaman bagi pelajar baharu dan sedia ada bagi tahun 2019 hingga 2023 diunjurkan sebanyak RM15 bilion atau RM3 bilion setiap tahun.

Untuk makluman Ahli Yang Berhormat Kuala Krau dan Bera, sehingga kini, PTPTN telah berjaya mengutip sebanyak RM13.86 bilion atau 68.62 peratus daripada seramai 1.5 juta peminjam. Walaubagimapun, seramai 373,975 orang peminjam atau 19.65 peratus masih tidak pernah

membuat pembayaran balik pinjaman mereka dengan jumlah sebanyak RM2.74 bilion.

Demi kesinambungan pinjaman kepada peminjam baharu, PTPTN telah menjalankan kajian holistik mengenai dasar baharu bayaran balik pinjaman PTPTN yang telah mengambil kira dana peminjam baharu dan dalam masa yang sama menyesuaikan dengan kemampuan bayaran balik oleh peminjam. Hasil kajian akan dibentangkan dalam Mesyuarat Jemaah Menteri untuk persetujuan.

Untuk makluman Ahli Yang Berhormat juga, bagi memastikan peminjam terus membuat bayaran balik secara konsisten, PTPTN masih mengekalkan penyenaraian nama peminjam di dalam Sistem Rujukan Maklumat Kredit Berpusat (CCRIS) Bank Negara Malaysia. Penyenaraian dalam CCRIS merupakan amalan biasa oleh institusi kewangan bagi memastikan bakal peminjam mempunyai rekod bayaran yang baik dan mampu membuat bayaran balik.

Peminjam yang berhasrat untuk membuat pinjaman dengan pihak bank seharusnya telah membuat bayaran secara konsisten kepada PTPTN.

Sekian, terima kasih

RJM76

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : DATUK AARON AGO DAGANG [KANOWIT]

TARIKH : 1 NOVEMBER 2018 (KHAMIS)

SOALAN : 6

minta **MENTERI PEMBANGUNAN LUAR BANDAR** menyatakan apakah sebenarnya tanggungjawab Kementerian KPLB terhadap pembangunan kawasan luar bandar terutama bagi Sarawak dan Sabah selepas "*restructuring*" proses/pembahagian tanggungjawab kepada beberapa Kementerian lain baru-baru ini. Apakah tugas "*residual*" yang masih di bawah Kementerian KPLB.

JAWAPAN

Tuan Yang Di-Pertua,

Untuk makluman Yang Berhormat, Kementerian masih lagi memainkan peranan yang penting dalam pembangunan kawasan luar bandar terutamanya di negeri Sabah dan Sarawak. Program-program di bawah Kementerian masih lagi memberi fokus kepada penyediaan infrastruktur luar bandar di Sabah dan Sarawak seperti Projek Jalan Luar Bandar, Bekalan Air dan Elektrik Luar Bandar serta Pembinaan Rumah PPRT.

Kementerian juga bertanggungjawab dalam pelaksanaan program-program pembangunan ekonomi luar bandar yang melibatkan pembangunan usahawan, pembiayaan dan modal insan seperti Program Wanita Inspirasi Ekonomi (WISE) di bawah MARA, Program Latihan Kemahiran dan Kerjaya (PLKK), dan Program Peningkatan Pendapatan (PPP).

Disamping itu, Kementerian juga bertanggungjawab untuk mengawal selia Majlis Pengurusan Komuniti Kampung (MPKK) yang berperanan untuk merancang dan melaksanakan pelan pembangunan kampung disamping memangkin penglibatan komuniti setempat termasuk di Sabah dan Sarawak.

Untuk makluman Yang Berhormat juga, Kementerian telah melancarkan Pelan Harapan Pembangunan Luar Bandar pada 29 Oktober 2018 yang bertemakan 'Luar Bandar Sejahtera'. Pelan ini merupakan perancangan dan hala tuju pembangunan luar bandar bagi 5 tahun yang akan datang iaitu 2018 hingga 2023 berdasarkan aspirasi rakyat seperti mana yang terkandung dalam Manifesto Pakatan Harapan. Pelan ini meliputi 6 Teras iaitu:

- 1) **Prasarana** yang lengkap dan berkualiti;
- 2) **Ekonomi** luar bandar yang berdaya saing;
- 3) **Keusahawanan** yang melibatkan pemerksaan usahawan luar bandar dan mewujudkan sumber pendapatan alternatif;
- 4) **Modal Insan** bagi melahirkan masyarakat luar bandar yang berilmu, mahir dan cemerlang;

SOALAN NO : 6

- 5) Memperkasakan **Wanita** luar bandar; dan
- 6) **Sistem Penyampaian** yang mengutamakan keperluan rakyat.

6 Teras ini meliputi 29 Strategi dan 94 Program yang akan dilaksanakan bagi memenuhi hasrat dan aspirasi tema 'Luar Bandar Sejahtera' tersebut.

Di bawah Pelan Harapan Pembangunan Luar Bandar ini juga, Kementerian akan memberi tumpuan untuk membangunkan 28 daerah di Malaysia dengan purata pendapatan bulanan terendah termasuk di negeri Sabah dan Sarawak.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN WONG SHU QI
[KLUANG]**

TARIKH : 1 NOVEMBER 2018 (KHAMIS)

SOALAN NO. 7

Minta **MENTERI PERUMAHAN DAN KERAJAAN TEMPATAN** menyatakan :-

- a) jumlah unit **rumah yang dimiliki oleh warga asing** (mengikut kewarganegaraan) serta **rakyat Malaysia**; dan
- b) **CCC yang telah dikeluarkan.**

JAWAPAN

Yang di-Pertua,

- a) Untuk makluman Yang Berhormat, berdasarkan input daripada Kementerian Pelancongan, Seni dan Budaya (MOTAC), jumlah unit rumah yang dimiliki oleh warga asing melalui Program Malaysia Rumah Keduaku (MM2H), bagi tempoh 2007 hingga 2018, adalah sebanyak 4,499 unit rumah. Warganegara China merupakan pembeli hartanah terbanyak dengan jumlah 1,664 unit, diikuti United Kingdom (357), Bangladesh (250), Iran (217), Jepun (208), Pakistan (192), Singapura (175), Australia (147), Republik Korea (127), Amerika Syarikat (115) dan lain-lain (1,047).

Manakala berdasarkan data Banci Penduduk dan Perumahan Malaysia 2010 oleh Jabatan Perangkaan Malaysia pula, sebanyak 3,634,227 isi rumah warganegara dan 106,197 isi rumah bukan warganegara memiliki unit perumahan di seluruh negara.

- b) Untuk makluman Yang Berhormat juga, berdasarkan rekod daripada Lembaga Arkitek Malaysia (LAM) Kementerian Kerja Raya (KKR), sejumlah 3,012 *Certificate Completion and Compliance* (CCC) telah dikeluarkan dalam tempoh Januari hingga Jun 2018.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 1 NOVEMBER 2018 (KHAMIS)

SOALAN NO. 8

Minta **MENTERI BELIA DAN SUKAN** menyatakan apakah perancangan pihak Kementerian mengenai pembangunan belia luar bandar dan pedalaman di Wilayah Sarawak dan adakah kerajaan mempunyai polisi baru bagi mengurangkan jurang pembangunan antara belia bandar dan luar bandar serta apakah pendirian kerajaan mengenai pembangunan belia di kalangan kaum minoriti seperti masyarakat penan.

JAWAPAN

Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) menerusi Jabatan Belia dan Sukan Negara (JBSN) ada melaksanakan program pembangunan belia secara menyeluruh di peringkat kebangsaan, negeri dan daerah. Ini merangkumi program-program untuk belia di bandar mahupun di luar bandar, termasuk di kawasan pedalaman serta di kalangan kaum minoriti.
2. Sebagai contohnya, di Negeri Sarawak, program-program seperti Kursus Belia Tani dan Youth Career telahpun dianjurkan. Program seperti Youth Career yang masih lagi sedang berjalan merangkumi kawasan-kawasan seperti Bahagian Kuching, Samarahan, Sibu, Bintulu, Sri Aman, Betong, Sarikei, Mukah dan Limbang.
3. Namun, kerajaan sedar bahawa usaha masa kini masih belum mencukupi. Contohnya daripada rekod yang saya terima, program Kursus Belia Tani yang dilaksanakan pada November 2017 hanya mampu mencapai kepada 30 orang peserta, manakala program Youth Career yang berlangsung antara Jun sehingga November tahun ini pula hanya melibatkan 50 orang peserta.
4. Jelas, satu pendekatan baharu perlu diambil bagi memantapkan lagi pembangunan belia terutamanya di kawasan luar bandar, belia kawasan pedalaman dan belia minoriti, termasuklah komuniti Masyarakat Penan.
5. Dalam tempoh masa empat bulan ini, warga KBS telah diberi mandat untuk menelitikan semula model dan strategi Kementerian sebelum ini bagi tujuan menambahbaik segala semua program dan projek kementerian.

SOALAN NO : 8

6. Sudah tentu, dalam aspek ini, pembangunan belia luar bandar dan belia pedalaman akan diberi perhatian yang serius.
7. Falsafah yang akan digunapakai ialah yang pertama “penyahpusatan” ataupun decentralisation, kedua “pengupayaan setempat”, ataupun local empowerment dan ketiganya “pendemokrasian” ataupun democratisation.
8. Secara ringkasnya, setiap cawangan JBSN termasuk Pejabat Belia dan Sukan Daerah. akan diberikan kuasa dan ruang yang lebih besar untuk membuat keputusan berkaitan pembangunan belia di kawasan masing-masing. Selain itu, para belia di kawasan tersebut juga akan digalakkan untuk merekabentuk, merancang dan melaksanakan program-program yang sesuai melalui usahasama dengan kerajaan dan pihak swasta. Kementerian akan meluaskan capaian kepada kumpulan-kumpulan belia bukan arus perdana termasuk belia-belia yang tidak berpersatuan agar mereka juga boleh mengambil bahagian. Akhir sekali, KBS akan memastikan agar konsep pengupayaan belia minoriti dan juga pengarusperdanaan gender akan diterapkan sebagai dasar kementerian di setiap peringkat.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : TUAN AHMAD FAIZAL BIN DATO' AZUMU [TAMBUN] – PH PPBM

TARIKH : 1 NOVEMBER 2018 (KHAMIS)

SOALAN : 9

PR-1412-L02467

TUAN AHMAD FAIZAL BIN DATO' AZUMU [TAMBUN] minta **MENTERI KOMUNIKASI DAN MULTIMEDIA** menyatakan apakah langkah-langkah dan usaha untuk mempertingkatkan jaringan internet di Perak agar selari dengan Wilayah Persekutuan dan Pulau Pinang sejajar dengan komitmen Kerajaan Persekutuan dalam menjayakan Industri 4.0.

JAWAPAN:

Tuan Yang di-Pertua,

1. Untuk makluman Ahli Yang Berhormat, kerajaan sentiasa memberikan tumpuan kepada pembangunan infrastruktur komunikasi terutamanya di kawasan luar bandar di seluruh negara termasuklah di Perak.
2. Antara langkah-langkah yang telah dilaksanakan ialah insiatif Peluasan Liputan Selular dan Jalur Lebar Mudah Alih yang melibatkan pembinaan menara komunikasi baharu dan penaiktarafan menara sedia ada dengan liputan jalur lebar mudah alih. Sehingga kini, Kerajaan telah membina sebanyak 109 menara komunikasi yang beroperasi dengan liputan jalur lebar mudah alih di Perak dan masih terdapat 31 menara sedang dalam peringkat pelaksanaan. Ini merupakan tambahan kepada 1,570 struktur pemancar komunikasi yang telah dibina secara komersial oleh syarikat pemberi perkhidmatan di negeri Perak.
3. Pihak Kerajaan juga berusaha mempertingkatkan perkhidmatan jalur lebar talian tetap melalui pelaksanaan projek Jalur Lebar Berkelajuan Tinggi (HSBB) yang melibatkan penaiktarafan 16 ibusawat di samping projek Jalur Lebar Pinggir Bandar (SUBB) dan projek Jalur Lebar Luar Bandar (RBB) yang melibatkan penaiktarafan 55 ibusawat di kawasan pinggir bandar dan luar bandar di Perak.

SOALAN NO: 9

4. Inisiatif Peluasan Jaringan Teras Gentian Optik turut dilaksanakan secara berterusan dengan pelaksanaan projek Sistem Kabel Dasar Laut yang menghubungkan Pulau Pangkor dan daerah Lumut di Perak yang telahpun siap baru-baru ini.
5. Kesemua inisiatif ini diharap dapat meningkatkan perkhidmatan komunikasi di seluruh negeri Perak sekaligus membantu dalam membangunkan ekonomi digital dalam menjayakan revolusi Industri 4.0. Kerajaan komited untuk memastikan seluruh negara dapat mengaplikasikan internet bagi menjayakannya. Namun begitu, keadaan geografi fizikal berbeza di negeri-negeri ini menyebabkan corak kepadatan dan jarak penduduk adalah berbeza di setiap negeri tersebut.
6. Selain itu, kerjasama dan sokongan dari Kerajaan Negeri dalam pembangunan infrastruktur komunikasi adalah amat penting untuk memastikan liputan perkhidmatan komunikasi dapat dipertingkatkan dengan lebih cepat memandangkan penguatkuasaan garis panduan dan kelulusan bagi pembinaan sebarang infrastruktur berada di bawah bidang kuasa Kerajaan Negeri melalui Pihak Berkuasa Tempatan yang berkaitan. Dalam hal ini, Kerajaan Negeri perlu memudahcara dalam memberi kelulusan dan hak laluan ke atas pembangunan infrastruktur komunikasi serta memastikan kadar bayaran untuk pelbagai permit yang diperlukan untuk membina infrastruktur komunikasi adalah tidak membebankan sekaligus persaingan yang lebih sihat dan kompetitif dapat diwujudkan.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATUK HAJI SHABUDIN BIN YAHAYA

TARIKH : 01 NOVEMBER 2018

SOALAN :

Datuk Haji Shabudin bin Yahaya [Tasek Gelugor] minta **MENTERI TENAGA MANUSIA** menyatakan apakah hala tuju serta perancangan strategik Kementerian dalam memastikan pendidikan TVET ini selari dengan keperluan Revolusi Industri 4.0.

PR-1412-L02115

JAWAPAN

Tuan Yang Di Pertua,

1. Untuk makluman ahli-ahli Yang Berhormat, Kementerian Sumber Manusia sedang melaksanakan Kajian Pelan Induk TVET yang merupakan satu kajian komprehensif berhubung dengan pelan tindakan jangka panjang sehingga tahun 2050 yang akan merangkumi isu permintaan dan penawaran TVET ke arah menangani isu jurang kemahiran dan keperluan industri termasuk Industri 4.0. Kajian ini akan melihat pemadanan antara permintaan dan penawaran mengikut keperluan sektor ekonomi untuk memastikan kebolehpasaran pekerjaan yang tinggi di kalangan lepasan TVET dengan kadar gaji yang lebih baik. Kajian ini juga dapat membantu dalam penilaian semula program-program TVET sedia ada dan mencadangkan pembaharuan ke atas pendekatan dan kurikulum program TVET. Pelan tindakan jangka pendek, sederhana dan panjang turut dirangka bagi memastikan pelaksanaan program TVET dapat berjalan lancar.

2. Selain itu, pelbagai usaha dilaksanakan oleh Kementerian Sumber Manusia dalam memastikan pendidikan TVET ini selari dengan Industri 4.0 melalui jabatan/agensi dibawahnya. Langkah-langkah yang diambil oleh KSM adalah seperti berikut:

- (i) KSM melalui Jabatan Pembangunan Kemahiran (JPK), telah membangunkan *National Occupational Skills*

Standard (NOSS) bagi 21 sektor ekonomi yang mana telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry Lead Body* (ILB) adalah mengikut keperluan industri dan teknologi terkini termasuk bidang-bidang berkaitan Industri 4.0 , automasi, digitalisasi dan sebagainya;

- (ii) mengadakan sesi libaturus dengan pihak industri bersama jabatan/agensi terlibat bagi memberi gambaran jelas berkaitan Industri 4.0. Maklumat hasil perkongsian daripada sesi ini akan seterusnya digunakan untuk mengkaji dan meneliti keperluan tenaga kerja bagi menghadapi Industri 4.0 seterusnya mewujudkan peluang pekerjaan baharu; dan
- (iii) program *upskilling* dan *reskilling* disediakan kepada golongan pekerja bagi mempertingkatkan kemahiran mereka bagi menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dijalankan secara berterusan supaya kemahiran yang diperolehi sentiasa bersesuaian dengan keperluan industri semasa.

3. Kesimpulannya, pihak Kerajaan sentiasa komited dalam memastikan latihan kemahiran yang dilaksanakan kekal relevan dan memenuhi keperluan industri semasa supaya graduan kemahiran dapat bersaing dalam pasaran pekerjaan kelak.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN FONG KUI LUN
[BUKIT BINTANG]**

TARIKH : 1 NOVEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan jumlah kutipan cukai pelancongan yang dikenakan ke atas pelancong-pelancong asing yang menginap di hotel-hotel seluruh negara dengan menyenaraikan kutipan setiap negeri dari mula dikuatkuasa hingga sekarang.

JAWAPAN :

Tuan yang di-Pertua

Berdasarkan data yang diterima daripada Jabatan Kastam Diraja Malaysia, jumlah hasil kutipan Cukai Pelancongan daripada permulaan kuat kuasa sehingga September 2018 adalah sebanyak RM203,726,373.00. Pecahan kutipan hasil cukai pelancongan mengikut negeri adalah seperti berikut :

BIL	NEGERI	JUMLAH (RM)
1	Kuala Lumpur	80,306,911.00
2	Sabah	23,579,409.00
3	Pulau Pinang	20,919,683.00
4	Johor	14,677,757.00
5	Pahang	15,267,600.00
6	Melaka	9,582,250.00
7	Kedah	8,386,012.20
8	Selangor	8,941,312.00
9	Putrajaya	8,159,494.00
10	Sarawak	4,653,302.00
11	Negeri Sembilan	4,623,828.00
12	Perak	2,310,041.00
13	Terengganu	1,585,122.00
14	Labuan	425,327.00
15	Kelantan	267,232.00
16	Perlis	41,093.00
	JUMLAH	203,726,373.00

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN YUSUF BIN ABD WAHAB
[TANJONG MANIS]
TARIKH : 1 NOVEMBER 2018 (KHAMIS)

SOALAN NO. 12

Adakah perancangan Kerajaan untuk membina Kompleks Sukan di kawasan Tanjong Manis.

JAWAPAN:

Yang di-Pertua,

1. Untuk makluman Ahli Yang Berhormat, Kementerian Belia dan Sukan buat masa ini memberikan penumpuan dalam usaha untuk menaik taraf dan membaik pulih kemudahan sedia ada serta membina baharu infrastruktur sukan mengikut keperluan secara berperingkat berdasarkan kepada kajian (*feasibility study*) sesuatu kawasan. Kementerian juga amat mengalu-alukan kerjasama daripada pelbagai pihak seperti Kerajaan Negeri, Pihak Berkuasa Tempatan (PBT), Pihak Swasta serta Pertubuhan Bukan Kerajaan (NGO) dalam menyediakan kemudahan-kemudahan sukan di negara ini.
2. Untuk makluman Ahli Yang Berhormat jua, setakat ini terdapat sebelas (11) kemudahan sukan di Kawasan Tanjong Manis yang terdiri daripada Gelanggang Tennis, Dewan Serbaguna (Badminton), Gelanggang Tertutup Futsal, Gelanggang Sukan Pelbagai Guna dan Gelanggang Futsal 1Malaysia. Sebanyak empat (4) unit kemudahan sukan adalah di bawah seliaan Kerajaan Negeri dan tujuh (7) di bawah seliaan KBS.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : Dr. Kelvin Yii Lee Wuen
[Bandar Kuching]**

TARIKH : 01 November 2018 (Khamis)

SOALAN NO. 26

Minta **MENTERI PENGANGKUTAN** menyatakan status pelaksanaan Stage Bus Services Transformation (SBST) di Kuching. Nyatakan jangka masa dan tarikh pelaksanaan, jumlah keseluruhan kontrak, pelan terkini serta terperinci, perubahan dalam kontrak tersebut atas permintaan kerajaan negeri Sarawak dan sebab kelewatan pelaksanaan projek tersebut.

JAWAPAN

Yang di-Pertua,

1. Untuk makluman Yang Berhormat, Perjanjian Kontrak SBST telah ditandatangani di antara Kerajaan Persekutuan dengan dengan Konsortium BBK Sdn. Bhd iaitu sebuah gabungan syarikat-syarikat yang berdaftar di Negeri Sarawak pada 22 November 2017 yang telah diselaraskan oleh Bahagian Pembangunan, Jabatan Perdana Menteri pada ketika itu.
2. Jangka masa tarikh pelaksanaan adalah selama lima (5) tahun seperti yang tertakluk dalam Perjanjian Kontrak dengan syarat Konsortium BBK Sdn. Bhd. perlu memenuhi syarat dan terma yang dinyatakan.

3. Jumlah yang akan dibayar kepada Konsortium BBK Sdn. Bhd. mengikut Kontrak adalah tidak melebihi RM48,181,723.08 sahaja setahun, dan jumlah keseluruhan kontrak tidak melebihi RM240,908,615.40 sahaja untuk jangka masa lima (5) tahun beroperasi.
4. Pelan asal yang dikemukakan adalah dengan menggunakan 130 buah bas Diesel yang meliputi keseluruhan jarak sepanjang 560km, 27 laluan [15 laluan teras (trunk) dan 12 laluan pengantara (feeder)] dengan kadar kos operasi yang ditetapkan dalam Perjanjian Kontrak.
5. Pada Februari 2018, Kerajaan Negeri Sarawak telah mengemukakan cadangan kepada Kerajaan Persekutuan untuk menggunakan bas elektrik sepenuhnya dan kadar pemberian geran peruntukkan yang berbeza dari Perjanjian Kontrak asal. Pada masa ini cadangan tersebut masih dalam peringkat pertimbangan oleh Kerajaan Persekutuan. Pelaksanaan dan perluasan SBST di Malaysia juga bergantung kepada keupayaan kewangan semasa kerajaan.
6. Walau bagaimanapun, kerajaan komited untuk meningkatkan mutu perkhidmatan pengangkutan awam di bandar-bandar utama di seluruh Malaysia dengan kerjasama yang lebih rapat antara kerajaan persekutuan, kerajaan negeri dan pihak berkuasa tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI REEZAL MERICAN B. NAINA
MERICAN
[KEPALA BATAS]
TARIKH : 01 NOVEMBER 2018 (KHAMIS)

SOALAN NO. 14

Y.B. DATO' SERI REEZAL MERICAN B. NAINA MERICAN [KEPALA BATAS] minta **MENTERI KEWANGAN** menyatakan perincian mengenai cadangan-cadangan terkini *Public Finance Committee* terhadap situasi ekonomi negara. Majoriti rakyat khuatir tentang keadaan ekonomi yang kelihatan seperti cukup lesu mutakhir ini.

JAWAPAN

Tuan Yang di-Pertua,

1. Kerajaan telah menubuhkan Jawatankuasa Kewangan Awam (PFC) bagi meningkatkan tadbir urus dan memastikan pelaksanaan dasar fiskal yang lebih berkesan. Langkah ini bertujuan memastikan kedudukan kewangan Kerajaan dapat dipulihkan seterusnya memacu pertumbuhan ekonomi negara dan memastikan kesejahteraan rakyat.
2. Untuk makluman ahli-ahli Yang Berhormat, agensi kewangan dan antarabangsa seperti Tabung Kewangan Antarabangsa (IMF) dan Bank Dunia telah menyemak semula unjuran terkini pertumbuhan ekonomi negara bagi 2018 kepada 4.7% dan 4.9% berbanding unjuran asal 5.3% dan 5.4%. Walaupun unjuran disemak semula ini lebih rendah berbanding unjuran asal, namun ekonomi negara dijangka kekal mencatat pertumbuhan.
3. Pada masa yang sama, Kerajaan perlu mengambil langkah segera bagi memulihkan kewangan Kerajaan berikutan paras hutang dan liabiliti Kerajaan Persekutuan yang mencecah paras RM1 trilion. Selain itu, Kerajaan turut dibebani perbelanjaan *off-budget* termasuk yang berkaitan dengan syarikat 1MDB serta tuntutan tunggakan bayaran balik cukai pendapatan dan GST sebanyak RM35.4 bilion. Berikutan itu, Kerajaan telah membuat keputusan untuk menyemak semula pelaksanaan beberapa projek infrastruktur awam bagi memastikan hutang dan liabiliti Kerajaan dapat diturunkan ke paras yang lebih mampan. Kerajaan turut perlu memberi keutamaan untuk menyelesaikan tunggakan bayaran balik cukai memandangkan ini merupakan wang pembayar cukai yang perlu dikembalikan segera.
4. Dalam hal ini, Public Finance Committee (PFC) telah membincangkan dan menetapkan keutamaan langkah-langkah yang perlu dilaksanakan bagi memperkukuh kedudukan kewangan Kerajaan serta memastikan ekonomi negara terus berkembang. Ini termasuklah keperluan untuk menyelesaikan

pelbagai isu kewangan yang membelenggu Kerajaan seperti tunggakan tuntutan bayaran balik cukai dan tanggungan hutang syarikat 1MDB.

5. Mengenai kaedah peningkatan hasil, Kerajaan telah menubuhkan Jawatankuasa Pembaharuan Cukai bagi menjalankan kajian menyeluruh mengenai sistem percukaian serta sumber pendapatan baharu. Kerajaan juga telah melaksanakan kembali Cukai Jualan dan Cukai Perkhidmatan (SST) bagi menggantikan Cukai Barangan dan Perkhidmatan (GST) selain meningkatkan peruntukan untuk pembayaran balik cukai bagi tahun semasa dan seterusnya.

6. Kerajaan telah membentangkan Kajian Separuh Penggal Rancangan Malaysia Ke-11 yang menggariskan bidang keutamaan Kerajaan dan inisiatif bagi mencapai sasaran pembangunan dan sosioekonomi negara jangka sederhana yang ditetapkan. Kerajaan akan memperincikan inisiatif mengukuhkan kedudukan kewangan dan meningkatkan tahap sosioekonomi negara dalam Belanjawan 2019 yang akan dibentangkan pada esok hari. Secara keseluruhan, Kerajaan akan terus melaksanakan dasar mesra pelabur terutama bagi pelaburan swasta yang bernilai tambah tinggi. Kerajaan juga komited untuk memastikan pertumbuhan ekonomi yang dicapai bersifat inklusif serta dapat dinikmati faedahnya oleh pelbagai lapisan masyarakat dan bukan kepada golongan tertentu sahaja.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 1 NOVEMBER 2018 (KHAMIS)

SOALAN NO.15

Minta **MENTERI PENDIDIKAN** menyatakan sama ada Kementerian berhasrat untuk melaksanakan satu mekanisme pembayaran balik Tabung Pendidikan Tinggi Nasional (PTPTN) dilakukan melalui pemotongan gaji pekerja swasta secara wajib.

JAWAPAN

Tuan Yang di-Pertua,

Untuk makluman Ahli Yang Berhormat, pertanyaan ini telah dijawab bersekali dengan pertanyaan daripada YB Johor Bahru pada 1 November 2018 (Khamis).

Sekian, terima kasih.

RJM74

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. JEFFREY GAPARI KITINGAN
[KENINGAU]**

TARIKH : 1 NOVEMBER 2018 (KHAMIS)

SOALAN NO. 16

Minta **MENTERI HAL EHWAL EKONOMI** menyatakan apakah rancangan dan inisiatif Kementerian yang akan diambil untuk menggalakkan keusahawanan dan aktiviti-aktiviti pembangunan ekonomi luar bandar di Sabah dan Sarawak termasuk ekonomi digital dan e-perniagaan (*e-commerce*) atas talian dan apakah bantuan-bantuan yang akan diberi kepada penduduk luar bandar khasnya golongan muda dan Generasi Y termasuk graduan kolej dan universiti.

JAWAPAN

Yang di-Pertua,

Untuk makluman Yang Berhormat, Kerajaan Persekutuan komited dalam usaha menggalakkan keusahawanan dan aktiviti-aktiviti pembangunan ekonomi luar bandar di Sabah dan Sarawak bagi meningkatkan kesejahteraan rakyat. Dalam hal ini, antara langkah yang diambil Kerajaan ialah menggalakkan penglibatan golongan muda dan belia luar bandar menyertai aktiviti perniagaan dan keusahawanan melalui pelbagai insentif dan bantuan seperti bantuan modal perniagaan, bantuan premis dan peralatan perniagaan serta latihan keusahawanan dan khidmat nasihat. Program pembangunan keusahawanan seperti Tunas Usahawan Belia Bumiputera (TUBE), eUsahawan dan Mobilepreneur juga akan dipergiat bagi meningkatkan motivasi belia yang ingin menceburi bidang perniagaan.

Selain itu juga, Kerajaan melalui Perbadanan Usahawan Nasional Berhad (PUNB) ada menyediakan **peluang pembiayaan** kepada usahawan bagi memulakan atau mengembangkan aktiviti perniagaan mereka. Antara skim yang diperkenalkan oleh PUNB bagi membantu membangunkan usahawan belia adalah PROSPER Usahawan Muda (PUMA), Budding PUMA, Program JUMPER dan BizChallenge.

Melihat kepada kepentingan membantu penduduk luar bandar dan pedalaman Sabah dan Sarawak dalam bidang keusahawanan, PUNB juga telah mengambil langkah proaktif bagi menjalankan expo bergerak dari semasa ke semasa bagi mempromosikan skim-skim pembiayaan PUNB yang ada.

Selain itu, Kementerian-Kementerian lain turut menawarkan pembiayaan dalam usaha membangunkan usahawan Bumiputera luar bandar di dalam semua bidang ekonomi yang berdaya maju bagi mewujudkan peluang pekerjaan, meningkatkan pendapatan serta perniagaan yang berdaya maju kepada masyarakat di luar bandar. Pembiayaan yang ditawarkan adalah dalam bentuk pembelian aset, mesin atau peralatan, modal kerja dan pengubahsuaian atau naik taraf premis perniagaan.

Yang di-Pertua,

Antara rancangan dan inisiatif yang telah digariskan oleh Kerajaan di bawah Rancangan Malaysia Kesebelas (RMKe-11) bagi mempercepatkan

pertumbuhan ekonomi digital dengan meningkatkan peluasan dan kemampunan perniagaan di kawasan luar bandar termasuk di Sabah dan Sarawak adalah seperti:

- i. penerapan ICT akan dipertingkat dengan memperluas penerimgunaan teknologi digital (*digital adoption*);
- ii. memastikan inisiatif dalam Pelan Hala Tuju Strategik e-Dagang Kebangsaan (NeSR) dilaksana;
- iii. kapasiti dan liputan infrastruktur digital akan terus diperkukuh di Sabah dan Sarawak; dan
- iv. meingkatkan penglibatan sektor swasta dalam pembangunan infrastruktur digital.
- v. memperluaskan liputan perkhidmatan kurier ke kawasan luar bandar

Yang di-Pertua,

Bagi meningkatkan pengetahuan dan kemahiran penduduk luar bandar khususnya golongan muda pula, Kerajaan telah mengambil inisiatif meningkatkan program latihan kemahiran untuk pembangunan modal insan golongan tersebut. Latihan-latihan ini dikendalikan oleh pelbagai Kementerian dan agensi Kerajaan seperti Institut Kemahiran MARA, Institut Latihan Perindustrian (ILP), GiatMARA, Institut Kemahiran Belia Negara (IKBN) dan pusat-pusat latihan di bawah agensi kemajuan wilayah.

Di dalam aspek pembangunan modal insan ini, Kerajaan memberi fokus untuk memberikan pendidikan berkualiti di luar bandar yang bersifat inklusif dan terkini melalui penekanan kepada Pendidikan dan Latihan Teknikal (TVET). Dalam hal ini, Kerajaan berhasrat untuk memperkasakan program TVET sedia ada tanpa perlu menubuhkan institusi baharu, memperbanyak kursus TVET yang berorientasikan keperluan setempat dan menyediakan platform kepada golongan belia luar bandar untuk menyertai TVET. Peningkatan pengetahuan dan kemahiran di kalangan belia ini membolehkan mereka memberikan nilai tambah dalam penawaran produk dan perkhidmatan dalam membangunkan perniagaan mereka.

Sekian, terima kasih.

1 November 2018

Kementerian Hal Ehwal Ekonomi

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN

TARIKH : 1 NOVEMBER 2018 (KHAMIS)

**DARIPADA : TUAN KHOO POAY TIONG
[KOTA MELAKA]**

SOALAN : 17

Tuan Khoo Poay Tiong [Kota Melaka] minta **PERDANA MENTERI** menyatakan apakah kaedah atau proses yang akan digunakan oleh Suruhanjaya Pilihan Raya (SPR) untuk melapor kepada Parlimen seperti mana yang telah ditentukan oleh Kerajaan, dan adakah Kerajaan bercadang mewujudkan suatu Jawatankuasa Pilihan Khas Parlimen untuk memantau SPR secara berterusan.

**JAWAPAN: YB DATUK LIEW VUI KEONG
MENTERI DI JABATAN PERDANA MENTERI**

Tuan Yang di-Pertua,

1. Untuk makluman Ahli Yang Berhormat, pada masa ini Suruhanjaya Pilihan Raya (SPR) membuat pelaporan dari semasa ke semasa kepada YAB Perdana Menteri yang dipertanggungjawabkan untuk menyelia dan mengendalikan urusan berkaitan SPR. Walau bagaimanapun,, seperti mana yang telah diumumkan oleh YAB Perdana Menteri semasa membentangkan Kajian Separuh Penggal RMKe-11, usaha sedang

NO. SOALAN: 17

dibuat ke arah meletakkan SPR bertanggungjawab secara langsung kepada Parlimen.

2. Cadangan untuk mewujudkan Jawatankuasa Pilihan Khas untuk memantau SPR perlu dibawa ke Jawatankuasa Dewan, Majlis Dewan Rakyat untuk dibincangkan dan dipertimbangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SIVARRAAJH CHANDRAN
[CAMERON HIGHLANDS]
TARIKH : 01 NOVEMBER 2018 (KHAMIS)

SOALAN NO. 18

Y.B. DATO' SIVARRAAJH CHANDRAN [CAMERON HIGHLANDS] minta **MENTERI KEWANGAN** menyatakan:-

- (a) apakah sasaran spesifik angka hutang negara secara nominal atau nisbah, "Debt-to-GDP" yang dianggap baik dan sihat bagi kerajaan berdasarkan hutang negara berjumlah RM 1.087 trillion dan bolehkah hutang tersebut dikurangkan dalam 1 hingga 2 tahun seperti dimaklumkan oleh Perdana Menteri di Amerika Syarikat baru-baru ini; dan
- (b) apakah usaha oleh kerajaan untuk meningkatkan produktiviti dan meningkatkan nisbah kos sara hidup yang tinggi dan Bantuan Rakyat 1Malaysia yang dihentikan..

JAWAPAN

Tuan Yang di-Pertua,

1. Secara keseluruhannya, kedudukan komitmen hutang dan liabiliti Kerajaan adalah berjumlah RM1,087.3 bilion atau 80.3% daripada KDNK sehingga 31 Disember 2017. Daripada jumlah ini, hutang Kerajaan Persekutuan adalah sebanyak RM686.8 bilion atau 50.7% daripada KDNK, manakala komitmen liabiliti luar jangka yang perlu ditanggung Kerajaan adalah berjumlah RM199.1 bilion atau 14.7% daripada KDNK. Baki sebanyak RM201.4 bilion atau 14.9% daripada KDNK pula adalah bayaran pajakan kewangan (*finance lease*) bagi tempoh 2017 - 2045 ke atas projek yang dilaksanakan secara Public-Private Partnership (PPP) di bawah Unit Kerjasama Awam Swasta (UKAS). Kesemua ini merupakan obligasi tunai Kerajaan sehingga tahun 2045 yang perlu ditanggung melalui peruntukan tahunan bagi membiayai bayaran khidmat hutang dan bayaran pokok hutang serta bayaran pajakan kewangan (*finance lease*).

2. Pelaporan komitmen hutang dan liabiliti Kerajaan yang mencecah RM1 trilion adalah selaras dengan manual *Public Sector Debt Statistics* yang berasaskan perakaunan akruan yang dikeluarkan oleh pihak IMF pada 2011. Manual ini menekankan pelaporan liabiliti yang lebih menyeluruh, merangkumi kesemua hutang dan obligasi Kerajaan. Pelaporan ini juga selaras dengan perakaunan akruan baru Kerajaan di bawah *Malaysia Public Sector Accounting Standard* (MPSAS) yang sejajar dengan piawaian *International Public Sector Accounting Standard* (IPSAS).

3. Kerajaan sentiasa memastikan bayaran kupon dan pokok hutang Kerajaan Persekutuan dibayar mengikut jadual yang ditetapkan supaya tidak menjejaskan kedudukan negara. Dalam memastikan kemampuan Kerajaan untuk membayar hutang, kedudukan hutang Kerajaan Persekutuan dikawal selia di bawah akta-akta pinjaman iaitu Akta Pinjaman (Tempatan) 1959 [Akta 637], Akta Pendanaan Kerajaan 1983 [Akta 275], Akta Pinjaman Luar Negeri 1963 [Akta 403] dan Akta Bil Perbendaharaan (Tempatan) 1946 [Akta 188].

4. Berbanding dengan negara ASEAN lain, Singapura mempunyai kadar hutang 110.9% daripada KDNK pada 2017, Thailand (41.9%), Vietnam (58.2%) dan Filipina (37.8%). Manakala di kalangan negara bertaraf kredit 'A' seperti China (47.8%), Taiwan (35.2%), Lithuania (36.5%), dan Czech Republic (34.7%), didapati bahawa tahap keberhutangan negara adalah lebih tinggi berbanding negara-negara bertaraf kredit 'A' tersebut. Sehubungan itu, adalah wajar untuk Kerajaan mengambil langkah bagi mengurangkan tahap keberhutangan negara.

5. Bagi memastikan paras hutang Kerajaan Persekutuan adalah terkawal dan terurus, beberapa langkah kawalan berikut perlu dipatuhi iaitu:

- a. Memastikan perbelanjaan mengurus sentiasa dibiayai melalui hasil negara serta memastikan sebahagian daripada hasil negara tersebut dapat menampung sebahagian perbelanjaan pembangunan;
- b. Mengawal perbelanjaan dan memastikan peruntukan dibelanjakan dengan berhemat, cekap dan berkesan serta memberi penekanan kepada outcome, bagi mengelakkan pembaziran;
- c. Pinjaman Kerajaan adalah semata-mata untuk membiayai perbelanjaan pembangunan. Pinjaman ditumpukan kepada perbelanjaan pembangunan bagi projek berimpak tinggi yang akan memberi pulangan kepada negara dan rakyat dalam tempoh jangka masa panjang; dan
- d. Meneruskan dasar semasa Kerajaan dalam mengutamakan pinjaman dalam negeri yang tidak menyebabkan inflasi, dengan mengambil kira mudah tunai yang tinggi dan kos pinjaman yang lebih murah.

6. Bagi mengurangkan hutang entiti Kerajaan pula, langkah-langkah kawalan hutang berikut akan dilaksanakan:

- a. Mengkaji semula projek-projek yang melibatkan kos yang tinggi berdasarkan keperluan bagi mendapatkan kos yang lebih rendah;
- b. Bagi projek yang sedang dilaksanakan, keseluruhan kos projek akan dikaji semula untuk mengelakkan Kerajaan dicaj kos yang tidak

berpatutan;

- c. Projek infrastruktur mega seperti High Speed Rail (HSR), Mass Rapid Transit (MRT) dan East Coast Rail Link (ECRL) akan dikaji semula bagi meneliti struktur kos keperluan dan keutamaan projek serta memastikan keupayaan Kerajaan dalam membiayai serta membayar balik pinjaman yang dibuat;
- d. Menyediakan peruntukan tahunan dibawah perbelanjaan mengurus bagi memastikan bayaran pokok dan faedah dapat dibuat mengikut tempoh masa yang ditetapkan; dan
- e. Membiayai semula pinjaman pada kadar yang lebih rendah.

7. Kepatuhan yang tegas terhadap disiplin fiskal serta pengurusan hutang yang baik terus diberikan penekanan bagi memastikan kedudukan fiskal dan makroekonomi terus kukuh serta dapat menampai sebarang krisis.

Tuan Yang di-Pertua,

8. Kerajaan sentiasa prihatin terhadap kos sara hidup yang semakin meningkat. Oleh yang demikian, pelbagai langkah telah dan sedang dilaksanakan bagi membantu meringankan beban yang dihadapi oleh rakyat. Ini termasuk:

- a. memastikan bekalan barangan makanan mencukupi;
- b. meningkatkan bilangan rumah mampu milik;
- c. menjalankan aktiviti pemantauan dan penguatkuasaan bagi memastikan kesempatan tidak diambil oleh peniaga yang tidak bertanggungjawab untuk meraih keuntungan yang berlebihan berikutan pelaksanaan semula cukai jualan dan perkhidmatan (SST);
- d. memberi pelbagai bantuan persekolahan seperti bantuan makanan, buku teks dan bantuan geran perkapita;
- e. meningkatkan perkhidmatan penjagaan kesihatan di hospital dan klinik Kerajaan yang berkualiti untuk rakyat;
- f. meningkatkan liputan dan kualiti pengangkutan awam di bandar besar mahupun luar bandar serta memperkasa e-hailing;

9. Selain itu, bagi membolehkan rakyat terutama golongan berpendapatan rendah mendapatkan pekerjaan yang lebih baik dan seterusnya meningkatkan pendapatan dan produktiviti mereka, Kerajaan juga:

- a. mempertingkatkan Pendidikan dan Latihan Teknikal dan Vokasional (TVET) bagi meningkatkan kemahiran belia dan seterusnya peluang pekerjaan;
- b. menyediakan pelbagai bantuan kepada petani, pekebun kecil, dan penoreh getah bagi meningkatkan produktiviti dan hasil mereka.
- c. memberi pelbagai pinjaman dan biasiswa untuk melanjutkan pelajaran ke institusi pengajian tinggi awam atau swasta. Kelulusan dan kemahiran yang lebih tinggi akan membantu golongan B40 mendapat pekerjaan dan peluang pendapatan yang lebih baik.

10. Bagi membolehkan bantuan yang diberikan kepada rakyat sampai kepada golongan yang benar-benar memerlukan, Kerajaan juga sedang mengkaji untuk menambah baik bantuan seperti Bantuan Sara Hidup (BSH) dan subsidi minyak kepada satu bentuk yang lebih bersasar supaya ianya lebih efektif dan mengelakkan berlakunya ketirisan.

11. Melalui usaha-usaha ini, Kerajaan akan dapat mengoptimalkan penggunaan sumber kewangan yang semakin terhad dan pada masa yang sama dapat terus membantu meringankan beban kos sara hidup rakyat.

NO. SOALAN: 19

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : YB TUAN WONG CHEN [SUBANG]

TARIKH : 01 NOVEMBER 2018 (ISNIN)

SOALAN : 19

Tuan Wong Chen [Subang] minta **PERDANA MENTERI** menyatakan apakah undang-undang anti rasuah yang bakal dikemukakan di Parlimen dalam enam bulan yang akan datang ini.

JAWAPAN: YB Datuk Liew Vui Keong,
Menteri Di Jabatan Perdana Menteri

Yang Berhormat,

Untuk makluman YB Subang, Mesyuarat Jawatankuasa Khas Mengenai Anti Rasuah pada dasarnya telah bersetuju dengan cadangan Suruhanjaya Pencegahan Rasuah Malaysia (SPRM) untuk memperkasakan Suruhanjaya tersebut dan peruntukkan undang-undang bagi memastikan jenayah rasuah dapat dibentaras dengan lebih baik dan berkesan. Antara yang telah dipersetujui adalah untuk mewujudkan peruntukkan undang-undang dalam akta SPRM sedia ada bagi mewajibkan Ahli-Ahli Politik dan juga pegawai kanan kerajaan mengisytiharkan harta kepada SPRM. Disamping itu peruntukkan berhubung salah laku oleh pegawai awam akan turut diperkenalkan agar salahlaku tersebut boleh diambil tindakan jenayah berbanding tindakan tatatertib pada ketika ini. Adalah diharapkan dengan pengenalan peruntukkan undang-undang ini dapat membendung ketirisan berulang yang selalu dilaporkan dalam Laporan Ketua Audit Negara.

SOALAN NO: 20

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : PUAN HAJAH SITI ZAILAH BINTI MOHD YUSOFF
[RANTAU PANJANG]**

TARIKH : 1 NOVEMBER 2018

SOALAN : 20

PUAN HAJAH SITI ZAILAH BINTI MOHD YUSOFF [Rantau Panjang] minta **PERDANA MENTERI** menyatakan senarai ahli rombongan dan keseluruhan kos yang ditanggung oleh Kerajaan bersempena lawatan Perdana Menteri bagi menghadiri Perhimpunan Agung PBB 2018 di Amerika Syarikat.

JAWAPAN: **YB DATUK LIEW VUI KEONG**

MENTERI DI JABATAN PERDANA MENTERI

Tuan Yang Di Pertua,

1. Untuk makluman Ahli Yang Berhormat, kos keseluruhan Lawatan Rasmi YAB Perdana Menteri dan delegasi bagi menghadiri Perhimpunan Agung PBB 2018 di Amerika Syarikat yang ditampung menggunakan peruntukan Jabatan Perdana Menteri adalah berjumlah **RM3,324,353.47**.
2. Kos perbelanjaan ini dibayar sewajarnya seperti mana termaktub dalam Akta Ahli Parlimen (Saraan) 1980 (Akta 237) dan perbelanjaan bagi para pegawai yang turut serta dalam lawatan rasmi YAB Perdana Menteri ini ialah berdasarkan kelayakan bertugas rasmi di bawah Perintah Am Bab B.
3. Ini merupakan lawatan pertama YAB Tun Dr. Mahathir sebagai Perdana Menteri Malaysia ke-7 ke Perhimpunan Agung PBB, untuk mewakili Kerajaan baharu dengan mandat dan aspirasi yang baharu. YAB Perdana Menteri telah menyampaikan kenyataan Malaysia semasa sesi Debat Umum pada 28 September 2018 yang menampilkan Malaysia baharu sebagai sebuah demokrasi matang yang mendukung kedaulatan undang-undang. YAB Perdana Menteri juga telah menggariskan komitmen Malaysia untuk bekerjasama dengan negara-negara anggota PBB yang lain bagi mencapai matlamat di bawah tema sesi Debat Umum yang Ke-73 dan seterusnya. Beliau juga menekankan harapan Malaysia terhadap PBB sebagai pertubuhan antarabangsa utama yang dimandatkan untuk mengekalkan keamanan dan keselamatan antarabangsa.

4. Di samping itu, YAB Perdana Menteri telah menyampaikan ucap tama di acara “Achieving SDGs: Unleashing the Potential of Islamic Finance” di PBB pada 27 September 2018, yang dianjurkan bersama oleh Suruhanjaya Sekuriti Malaysia, Program Pembangunan PBB (UNDP) dan Bank Pembangunan Islam (IDB).

5. Antara program penting yang lain yang melibatkan YAB Perdana Menteri termasuklah dialog dengan ahli-ahli U.S. Council on Foreign Relations, perbincangan panel Bloomberg Global Business Forum serta ucap tama di Asia Society. YAB Perdana Menteri turut ditemuramah oleh Washington Post, Wall Street Journal dan TRT World serta bertemu dengan usahawan terkemuka dan bakal pelabur dari Amerika Syarikat sepanjang tempoh beliau di New York.

6. Di samping itu, YAB Perdana Menteri telah mengadakan pertemuan dua hala dengan rakan sejawatnya di sela-sela Sesi Ke-73 Perhimpunan Agung PBB, untuk membincangkan perkara-perkara berkepentingan bersama. Pertemuan sedemikian bertujuan mengeratkan hubungan dua hala yang sedia ada terjalin dengan negara-negara berkenaan, serta mengukuhkan persefahaman antara para pemimpin dalam isu-isu global dan serantau.

7. Secara keseluruhan, Lawatan Kerja YAB Perdana Menteri ke US ini telah berjaya mengangkat kembali Malaysia di persada dunia di samping mewujudkan hubungan diplomatik yang lebih erat dan kerjasama ekonomi serta potensi perdagangan yang lebih besar.

Sekian. Terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

DARIPADA : TUAN SU KEONG SIONG [KAMPAR]

TARIKH : 1 NOVEMBER 2018

SOALAN : 21

Tuan Su Keong Siong [Kampar] minta **MENTERI DALAM NEGERI** menyatakan langkah-langkah yang di ambil oleh Kementerian untuk mengekstradisi ahli perniagaan, Low Taek Jho atau Jho Low pulang ke Malaysia berhubung siasatan penyelewengan wang dana 1Malaysia Development Bhd (1MDB).

JAWAPAN

Tuan Yang Di-pertua,

Penama Low Taek Jho atau dikenali dengan Jho Low dikehendaki bagi membantu siasatan berhubung skandal Syarikat 1 Malaysia Development Berhad [1MDB]. Pihak Kerajaan telah mendapatkan *Red Notice* terhadap beliau dan langkah-langkah sedang diuruskan untuk mengesan penama dengan kerjasama negara-negara lain.

Satu mesyuarat *task-force* melibatkan Negara Malaysia, Amerika Syarikat, Switzerland dan Singapura telah diadakan di Jabatan Peguam Negara, Putrajaya pada 18 dan 19 September 2018 yang lalu. Antara agenda yang di bincangkan adalah berkaitan siasatan dan pengumpulan keterangan yang melibatkan kes 1MDB, penyitaan aset yang berada di luar negara serta kaedah untuk mengesan penama Jho Low dan proses-proses yang perlu dilalui untuk membawa balik beliau ke Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA, PARLIMEN
KEEMPAT BELAS**

PERTANYAAN : LISAN
DARIPADA : TUAN CHE ALIAS BIN HAMID
[KEMAMAN]
TARIKH : 1 NOVEMBER 2018 (KHAMIS)

SOALAN NO. 6

Minta **MENTERI PERTANIAN DAN INDUSTRI ASAS TANI** menyatakan status pelaksanaan skim insurans perlindungan atau takaful kepada para petani.

JAWAPAN

Yang di-Pertua,

Kementerian Pertanian dan Industri Asas Tani (MOA) merancang untuk memulakan skim perlindungan agromakanan (SPA) untuk membantu petani yang kerugian hasil pengeluaran akibat banjir, kemarau ataupun penyakit bagi memulakan semula aktiviti pertanian mereka. SPA adalah sebahagian daripada bantuan yang diberikan oleh Kerajaan di samping bantuan dan subsidi lain.

SPA dijangka akan bermula dengan fokus ke atas industri padi dengan projek rintis di kawasan Lembaga Kemajuan Pertanian Kemubu (KADA) dan Lembaga Kemajuan Pertanian Muda (MADA) tertakluk kepada ketersediaan data yang diperlukan dalam analisis perlindungan tanaman.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI ISMAIL SABRI BIN YAAKOB
[BERA]
TARIKH : 01 NOVEMBER 2018 (KHAMIS)

SOALAN NO. 23

Y.B. DATUK SERI ISMAIL SABRI BIN YAAKOB [BERA] minta **MENTERI KEWANGAN** menyatakan:-

- (a) berapakah jumlah dan nilai aset terkini pelaburan 1MDB beserta perincian yang jelas; dan
- (b) nyatakan jumlah hutang 1MDB yang terkini.

JAWAPAN

Tuan Yang Dipertua,

Untuk makluman Dewan yang mulia, pihak pengurusan 1Malaysia Development Bhd (1MDB) kini sedang mengemas kini akaun syarikat sehingga 30 Jun 2018 di mana satu audit interim akan dilaksanakan bagi tempoh dari 1 April 2018 hingga 30 Jun 2018. Ini penting bagi menentukan kedudukan sebenar aset dan liabiliti 1MDB.

Namun begitu, secara amnya, aset utama yang masih dimiliki oleh 1MDB pada masa ini ialah tanah Pulau Indah di Klang, Selangor yang berkeluasan kira-kira 318.42 ekar. Manakala hutang yang masih belum dilunaskan oleh 1MDB pula adalah seperti berikut:

Bil.	Hutang	Tarikh Bayaran Faedah	Jumlah Prinsipal (RM Million) USD1=RM4.15	Jumlah Faedah (RM Million) USD1=RM4.15	Jumlah Keseluruhan (RM Million) USD1=RM4.15
1.	Sukuk IMTN terbitan 1MDB (P:RM5b, i:5.75%, M: 2039)	Mei & Nov	5,000	6,037.5	11,037.5
2.	Bon terbitan 1MDB Global Investment Ltd (P:USD3b, i:4.4%, M:2023)	Mac & Sept	12,450	2,465	14,915
3.	Bon terbitan 1MDB Energy (Langat) Ltd (P:USD1.75b, i:5.75%, M:2022)	April & Okt	7,262.5	1,670.5	8,933
4.	Bon terbitan 1MDB Energy Ltd (P:USD1.75b, i:5.99%, M:2022)	Mei & Nov	7,262.5	1,740	9,002.5
	Jumlah		31,975	11,913	43,888

Nota:

P : Prinsipal

i : Faedah

M : Tahun matang

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAJ]

TARIKH : 1 NOVEMBER 2018 (KHAMIS)

SOALAN NO.24

Minta **MENTERI PENDIDIKAN** menyatakan apakah fungsi penubuhan Majlis Bahasa Melayu dan adakah peranannya sama seperti Dewan Bahasa dan Pustaka.

JAWAPAN

Tuan Yang di-Pertua,

Majlis Bahasa Melayu adalah tidak sama peranannya dengan Dewan Bahasa dan Pustaka (DBP) kerana matlamat penubuhan Dewan Bahasa dan Pustaka seperti yang tercatat dalam Akta DBP (semakan tahun 1978, pindaan dan peluasan 1995) antaranya adalah seperti berikut:

1. membina dan memperkaya bahasa kebangsaan dalam semua bidang termasuk sains dan teknologi;
2. memperkembangkan bakat sastera, khususnya dalam bahasa kebangsaan; dan
3. mencetak atau menerbitkan atau membantu dalam percetakan atau penerbitan buku-buku, majalah-majalah, risalah-risalah dan lain-lain bentuk kesusasteraan dalam bahasa kebangsaan dan dalam bahasa-bahasa lain.

Manakala peranan Majlis Bahasa Melayu berkait rapat dengan Kerangka Standard Bahasa Melayu (KSBM). Kementerian Pendidikan Malaysia (KPM) membangunkan Kerangka Standard Bahasa Melayu (KSBM) sebagai satu kerangka dalam menentukan tahap penguasaan bahasa Melayu dalam kalangan pengguna bahasa Melayu, pegawai agensi kerajaan dan bukan kerajaan. KSBM menjadi rujukan dalam membina instrumen pemerolehan dan penguasaan bahasa Melayu, kurikulum pendidikan bahasa Melayu di sekolah, universiti dan pembangunan kurikulum kursus pembangunan profesionalisme berterusan pelbagai kementerian dan institusi pendidikan. Fungsi Majlis Bahasa Melayu adalah seperti berikut:

1. badan yang mengawal selia dan mengiktiraf Kerangka Standard Bahasa Melayu (KSBM);
2. badan bebas yang menyetarakan program yang berkaitan dengan pemerolehan dan penguasaan bahasa Melayu;
3. Badan yang berperanan sama seperti Council of Europe yang mengawal selia *Common European Framework of Reference for Languages* (CEFR);
4. menerajui usaha-usaha untuk memartabatkan pendidikan bahasa Melayu dengan menggunakan KSBM dalam negara hingga ke peringkat antarabangsa;
5. menjamin kualiti program bahasa Melayu yang ditawarkan di institusi pengajian tinggi; dan
6. melaksanakan penyelidikan dan kawalan mutu KSBM yang berterusan untuk memantapkan KSBM.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 1 NOVEMBER 2018

SOALAN : 25

Tuan Ramkarpal Singh A/L Karpal Singh [Bukit Gelugor] minta MENTERI DALAM NEGERI menyatakan sama ada siasatan telah dibuat terhadap dakwaan campur tangan kehakiman ('judicial meddling') dalam Rayuan kes hasutan Karpal Singh v Pendakwa Raya di Mahkamah Rayuan, dan sekiranya ya, apakah hasil siasatan tersebut.

JAWAPAN

Tuan Yang Di Pertua,

Satu laporan polis berkaitan Damansara repot 11544/18 telah dibuat pada 23 Ogos 2018 oleh puan Sangeet Kaur Deo A/P Karpal Singh. Pihak polis masih menjalankan siasatan di bawah seksyen 228 Kanun Keseksaan dan akan melengkapkan kertas siasatan dalam tempoh yang terdekat untuk dirujuk kepada Timbalan Pendakwaraya untuk arahan selanjutnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI HAMZAH BIN ZAINUDIN
[LARUT]
TARIKH : 01 NOVEMBER 2018 (KHAMIS)

SOALAN NO. 26

Y.B. DATO' SERI HAMZAH BIN ZAINUDIN [LARUT] minta **MENTERI KEWANGAN** menyatakan apakah *Urban Transformation Centre* (UTC) dan *Rural Transformation Centre* (RTC) akan ditambah-baik dan dimanfaatkan kepada lebih ramai rakyat.

JAWAPAN

Tuan Yang Dipertua,

Hasrat Kementerian Kewangan selaku peneraju inisiatif UTC adalah untuk menubuhkan **UTC Negeri** di setiap ibu negeri di Malaysia. Sekiranya terdapat keperluan serta jika kedudukan kewangan Kerajaan membenarkan, Kementerian Kewangan akan mewujudkan **UTC Bandar** di bandar-bandar utama yang mempunyai kepadatan penduduk yang tinggi. Setakat ini Kerajaan telah membina 22 UTC di seluruh negara dan inisiatif ini telah memberikan impak yang tinggi kepada rakyat. Ini terbukti apabila seramai **68.9 juta orang pelanggan** telah mendapatkan perkhidmatan di UTC seluruh negara sejak memulakan operasi pada Jun 2012 hingga September 2018.

UTC beroperasi dari 8.30 pagi hingga 10.00 malam setiap hari kecuali cuti umum. Sehubungan dengan itu, penubuhan UTC perlu mengambil kira permintaan dan keperluan penduduk setempat agar perkhidmatan yang ditawarkan dapat dinikmati sebaiknya. Pada masa sama, penubuhan UTC perlu memastikan agar tidak membebankan agensi dari segi kos dan perjawatan kerana waktu operasi yang panjang akan menyebabkan pembaziran kepada Kerajaan sekiranya tidak mendapat sambutan sewajarnya daripada penduduk setempat.

Untuk makluman ahli-ahli Yang Berhormat, 2 UTC yang baru ditubuhkan adalah UTC Pasir Gudang (di Pasir Gudang, Johor) yang telah memulakan operasi pada 31 Disember 2017 dan UTC Selangor (di Shah Alam, Selangor) yang telah memulakan operasi pada 15 Ogos 2018. Bagi tahun 2019, Kementerian Kewangan merancang untuk menubuhkan UTC Pulau Pinang berdasarkan keperluan dan peruntukan yang disediakan. Kementerian Kewangan komited untuk terus menambah baik tahap perkhidmatan di UTC dalam usaha memastikan capaian terhadap perkhidmatan kerajaan dapat dinikmati oleh rakyat keseluruhannya.

Tuan Yang Dipertua,

Susulan keputusan Kerajaan supaya program Strategi Lautan Biru Kebangsaan (NBOS) tidak diteruskan dan inisiatif NBOS sedia ada diserahkan kepada Kementerian peneraju bagi menentukan halatuju baharu. KPLB selaku Kementerian peneraju program Rural Transformation Centre (RTC) telah

memutuskan halatuju baharu RTC seperti berikut:

- a. 5 RTC yang terletak di kawasan luar bandar kekal di bawah seliaan KPLB dan akan **dijenamakan semula**, Pusat Komuniti Desa. 5 RTC tersebut ialah RTC Johor, Kedah, Terengganu, Pahang dan Melaka;
- b. 2 RTC iaitu RTC Perak dan RTC Kelantan diserahkan semula kepada pihak FAMA, manakala 1 RTC iaitu RTC Pulau Pinang diserahkan semula kepada pihak MARA selaku pemilik bangunan. Ketiga-tiga RTC tersebut terletak di kawasan bandar atau berhampiran UTC dan pemilik bangunan didapati berkeupayaan serta mempunyai sumber untuk meneruskan operasi premis dengan fungsi sedia ada atau dikembalikan semula kepada fungsi asal agensi masing – masing; dan
- c. 3 RTC iaitu RTC Sarawak (di Betong dan Sibuti) serta RTC Negeri Sembilan (di Rembau), diserahkan kepada Kerajaan Negeri masing – masing bagi membolehkan pelaksanaan halatuju baharu dirancang mengikut kehendak Kerajaan Negeri.

Proses penjenamaan semula 5 RTC yang dikekalkan di bawah seliaan KPLB (dijenamakan semula sebagai Pusat Komuniti Desa) turut melibatkan **penambahbaikan fungsi dan peranan RTC bagi memberi manfaat yang lebih berfokus kepada rakyat**. Dalam hubungan ini, selain fungsi dan peranan sedia ada, RTC akan turut melaksanakan **fungsi dan peranan baharu** seperti berikut:

- a. sebagai lokasi atau **hub bagi pelaksanaan program Desa Digital**. Desa Digital adalah program KPLB dengan kerjasama Kementerian Komunikasi dan Multimedia Malaysia (KKMM), untuk **menaiktaraf kemudahan capaian internet di kawasan luar bandar sebagai suatu platform bagi usahawan desa memasarkan produk secara dalam talian**.
- b. sebagai **pusat aktiviti/latihan program-program pemerkasaan wanita**; dan
- c. sebagai **pusat pengumpulan dan pengedaran untuk Pos Malaysia** bagi kemudahan penduduk setempat.

Hala tuju baharu RTC yang ditetapkan oleh KPLB membolehkan pihak Kementerian **menyelaras semula fungsi dan tanggungjawab teras KPLB**

NO SOALAN : 26

kepada kumpulan sasar iaitu masyarakat luar bandar. Hala tuju baharu ini wajar dilihat sebagai usaha berterusan Kerajaan dalam **memastikan tiada pertindihan fungsi** antara agensi/Jabatan Kerajaan sebagai langkah **mengoptimumkan peruntukan kewangan Kerajaan.** Di samping itu, **fungsi dan peranan baharu RTC** merupakan **penambahbaikan berterusan** dalam usaha Kerajaan memberikan **perkhidmatan yang lebih berfokus untuk manfaat rakyat setempat.**

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Tuan Syed Ibrahim bin Syed Noh [Ledang]

TARIKH : 1 November 2018 (Khamis)

SOALAN : Tuan Syed Ibrahim bin Syed Noh minta
MENTERI PERTANIAN DAN INDUSTRI ASAS TANI menyatakan
Perkembangan terkini usaha menambah baik tadbir urus korporat
Lembaga Pertubuhan Peladang Kebangsaan (NAFAS)

JAWAPAN

Tuan Yang Dipertua,

Secara keseluruhannya hampir 83% sistem kerja NAFAS telah ditambah baik. Pentadbir NAFAS sedang menyusun semula sistem kerja NAFAS terutama di bahagian-bahagian berisiko tinggi di samping memantapkan tadbir urus korporat NAFAS.

Penambahbaikan terhadap sistem kerja NAFAS adalah merangkumi:

- I. Menambah baik dan menstruktur semula skim perjawatan NAFAS;
- II. menambah baik sistem kawalan dalaman NAFAS dalam pengurusan kewangan, pengurusan kumpulan wang, pengurusan perolehan dan akaun NAFAS;
- III. menyusun semula dan melaksanakan pengasingan kuasa di peringkat pengurusan NAFAS;
- IV. memperketatkan prosedur pemilihan Ahli Jemaah Pengarah (AJP) melalui proses tapisan oleh SPRM;
- V. meneliti kedudukan pelaburan NAFAS;
- VI. meneliti dan menyusun semula anak-anak syarikat NAFAS; dan
- VII. meneliti dan menambah baik pengurusan Dana Peladang Kebangsaan.

Langkah penambahbaikan tadbir urus korporat ini adalah bagi memastikan NAFAS dapat terus beroperasi dengan lebih efisien, efektif dan telus demi menjaga kepentingan peladang-peladang di seluruh negara.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 1 NOVEMBER 2018

SOALAN : 28

**Dato' Haji Ahmad Nazlan bin Idris [Jerantut] minta MENTERI
DALAM NEGERI** menyatakan jumlah tangkapan terkini kes premis
mesin judi haram serta nyatakan tindakan susulan Kerajaan di dalam
usaha membanteras pusat judi haram ini dari kembali beroperasi

JAWAPAN

Tuan Yang Di-Pertua,

Kementerian Dalam Negeri melalui Polis Diraja Malaysia (PDRM) amat komited dalam menangani judi haram di dalam negara dan memandangkan berat kenyataan pelbagai pihak yang mempersoalkan kesungguhan dan keberkesanan tindakan pihak Polis dalam menangani gejala tersebut. PDRM mengambil maklum segala pandangan yang disuarakan oleh pelbagai pihak dan akan melipatgandakan lagi usaha untuk memastikan kemelut judi ini dapat di bendung dengan lebih berkesan.

PDRM telah mengambil tindakan melalui 19,406 tangkapan pada tahun 2016, 18,432 tangkapan pada tahun 2017 dan 12,936 tangkapan sehingga Jun 2018.

Dalam memastikan aktiviti perjudian haram dapat dikekang sepenuhnya peranan kepada Ketua Polis Daerah dan Ketua Polis Balai digembeling sepenuh untuk membuat risikan dan mengambil tindakan terhadap premis yang menganjurkan aktiviti perjudian haram secara atas talian atau perjudian secara terbuka. Antara langkah terbaharu yang diperkenalkan oleh Polis Diraja Malaysia (PDRM) dengan mewujudkan bilik gerakan serta talian khas yang beroperasi 24 jam sehari di seluruh negara bermula 20 Julai 2018 bagi memudahkan orang awam menyalurkan maklumat berkaitan perjudian tanpa lesen kepada pihak PDRM. Pihak Ketua Polis Daerah atau Ketua Polis Balai diarahkan untuk meneliti setiap maklumat yang diberikan dan mengambil tindakan sewajarnya terhadap aduan berkenaan.

Selain itu, Ketua Polis Daerah dan Ketua Polis Balai akan dipertanggungjawab sepenuh dan tindakan untuk menukarkan dari daerah berkenaan akan dibuat secara serta merta dan tindakan tatatertib akan diambil jika siasatan yang dibuat oleh Jabatan Integriti dan Pematuhan Standard (JIPS) mendapati pegawai polis terlibat atau melindungi sindiket perjudian dalam daerah pentadbirannya.

Hasil inisiatif yang diambil ini, telah menunjukkan impak yang positif yang mana orang awam telah tampil memberikan kerjasama dalam menyalurkan maklumat yang positif walaupun terdapat juga maklumat yang tidak berasas turut disalurkan. Hasil daripada tindakan yang diambil juga menunjukkan trend penurunan dalam aktiviti perjudian haram ini yang mana sindiket tidak lagi membuka semula premis setelah diserbu.

PEMBERITAHUAN PERTANYAAN LISAN
DEWAN RAKYAT MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN

DARIPADA : Y.B. TUAN CHOW KON YEOW
[TANJONG]

TARIKH : 1 NOVEMBER 2018 (KHAMIS)

SOALAN NO. 30

Y.B. TUAN CHOW KON YEOW [TANJONG] minta **MENTERI KEWANGAN** menyatakan adakah Kerajaan Pusat berhasrat meluluskan pinjaman mudah RM1 bilion kepada Pulau Pinang demi memastikan Penang Island Link 1 (PIL1) dapat dilaksanakan secara serentak dengan rangkaian transit aliran ringan (LRT) fasa pertama Pelan Pengangkutan Pulau Pinang (PTMP). Jika ya, bila. Jika tidak, nyatakan kenapa.

JAWAPAN

Tuan Yang Di-Pertua,

Buat masa ini, Kementerian Kewangan belum menerima sebarang permohonan pinjaman daripada pihak Kerajaan Negeri Pulau Pinang. Dengan kedudukan fiskal sekarang, Kerajaan hanya mampu memberikan pinjaman untuk masalah perbelanjaan pengurusan defisit atau untuk membayar gaji kakitangan Kerajaan negeri yang tidak mampu ditanggung oleh sesetengah negeri.

Kelulusan untuk tujuan pembangunan tersebut juga adalah tertakluk kepada kemampuan kewangan semasa Kerajaan untuk menyediakan peruntukan bagi tujuan pinjaman tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 1 NOVEMBER 2018 (RABU)

SOALAN NO. 31

Minta **MENTERI HAL EHWAL EKONOMI** menyatakan pelan tindakan jangka panjang tentang pembayaran royalti minyak khususnya negeri Terengganu sebanyak 20 peratus sepertimana ditetapkan dalam manifesto Pakatan Harapan.

JAWAPAN

Yang di-Pertua,

Sepertimana Ahli Yang Berhormat ambil maklum, Mesyuarat Pertama, Penggal Pertama Parlimen Keempat Belas yang lalu semasa penggulangan perbahasan menjunjung kasih Titah Seri Paduka Baginda Yang Di-Pertuan Agong pada 1 Ogos 2018, saya telah menyatakan antara lain, secara panjang lebar mengenai bayaran tunai (*cash payment*) atau lebih dikenali sebagai royalti minyak dalam Dewan yang mulia ini.

Saya juga telah menyatakan bahawa Kerajaan bercadang untuk menubuhkan Jawatankuasa Khas Kabinet yang dianggotai oleh wakil-wakil daripada Semenanjung, Sabah dan Sarawak yang mempunyai kepakaran dalam hal-hal berkaitan bertujuan untuk menyemak, mengkaji dan menambahbaik secara adil Perjanjian Malaysia 1963.

Sukacita saya maklumkan bahawa Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet bagi menyemak dan membuat pengesyoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung dalam Perlembagaan Malaysia 1963.

Tumpuan utama Jawatankuasa Khas Kabinet adalah kepada pelaksanaan perkara-perkara yang terkandung dalam manifesto Pakatan Harapan serta perkara-perkara berbangkit seperti bayaran tunai atau royalti minyak dan sebagainya yang akan dibincangkan secara berperingkat.

Selain itu juga wakil-wakil daripada Semenanjung, Sabah dan Sarawak, yang mempunyai kepakaran dan pengetahuan dalam hal-hal berkaitan, akan dilantik untuk menganggotai Jawatankuasa Khas Kabinet ini. Senarai keanggotaan tersebut akan dikemukakan kepada YAB Perdana

Menteri terlebih dahulu untuk persetujuan supaya tidak terlalu ramai dan mengikut kesesuaian kepakaran dan pengetahuan. Senarai yang telah dimuktamadkan akan diumumkan oleh Menteri di Jabatan Perdana Menteri (Undang-undang).

Untuk makluman Ahli Yang Berhormat, Jawatankuasa Khas Kabinet akan memberikan laporan terperinci kepada Kerajaan dalam tempoh 6 bulan dari tarikh penubuhan untuk pelaksanaan segera.

Jabatan Perdana Menteri melalui Bahagian Hal Ehwal Undang-Undang (BHEUU) sebagai urus setia Jawatankuasa Khas Kabinet sedang meneliti perkara di atas, supaya kepentingan semua pihak diambil kira selaras dengan Perjanjian Malaysia 1963.

Sehubungan itu, perkara-perkara yang dibangkitkan Ahli Yang Berhormat mengenai pembayaran 20 peratus royalti minyak, akan turut diambilkira dalam Jawatankuasa Khas Kabinet tersebut sehingga laporan dikeluarkan kepada Kerajaan untuk pelaksanaan oleh pihak-pihak berkaitan.

Sekian, terima kasih.
1 November 2018

Kementerian Hal Ehwal Ekonomi

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' ABDULLAH SANI B. ABDUL HAMID
(KAPAR)**

TARIKH : 1 NOVEMBER 2018

SOALAN : 32

Dato' Abdullah Sani bin Abdul Hamid [Kapar] minta **MENTERI DALAM NEGERI** menyatakan komitmen untuk membina bangunan Ibu Pejabat Polis Klang Utara yang baru dan penambahbaikan balai polis sedia ada supaya dapat memudahkan pentadbiran yang menjamin keselamatan dan kesejahteraan penduduk serta memberikan ruang yang selesa bagi anggota polis bertugas di kawasan tersebut.

JAWAPAN

Tuan Yang Di Pertua,

Cadangan pembangunan Ibu Pejabat Polis Daerah (IPD) Klang Utara telah diangkat dalam *Rolling Plan* Keempat (RP4), Rancangan Malaysia Kesebelas (RMKe-11) Tahun 2019 setelah proses dokumentasi pemilikan tapak di Lot 66029 seluas 8 ekar diselesaikan. Pada ketika ini, permohonan projek sedang dalam semakan dan pertimbangan Unit Perancang Ekonomi (EPU), Kementerian Hal Ehwal Ekonomi (MEA).

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 1 NOVEMBER 2018

SOALAN : 33

Tuan Ramkarpal Singh A/L Karpal Singh [Bukit Gelugor] minta MENTERI DALAM NEGERI menyatakan secara terperinci berkenaan sama ada siasatan telah dibuat terhadap dakwaan campur tangan kehakiman ('judicial meddling') dalam kes-kes Mahkamah Rayuan yang tertentu, dan sekiranya ya, apakah hasil siasatan tersebut.

JAWAPAN

Tuan Yang Di Pertua,

Satu laporan polis berkaitan Damansara repot 11544/18 telah dibuat pada 23 Ogos 2018 oleh puan Sangeet Kaur Deo A/P Karpal Singh. Pihak polis masih menjalankan siasatan di bawah seksyen 228 Kanun Keseksaan dan akan melengkapkan kertas siasatan dalam tempoh yang terdekat untuk dirujuk kepada Timbalan Pendakwaraya untuk arahan selanjutnya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATIN MASTURA BINTI MOHD YAZID
[KUALA KANGSAR]**

TARIKH : 1 NOVEMBER 2018 (KHAMIS)

SOALAN NO.34

Minta **MENTERI PENDIDIKAN** menyatakan apakah tindakan jangka panjang Kementerian bagi membendung masalah budaya ponteng sekolah dan keciciran golongan miskin tegar di kawasan pedalaman.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa mengambil tindakan proaktif dalam menangani isu ponteng sekolah dalam kalangan murid. Antara usaha berterusan yang telah dilaksanakan KPM adalah:

1. Mengeluarkan surat pekeliling ikhtisas dan surat siaran bagi tujuan penegasan kepada pihak sekolah untuk melaksanakan pencegahan dan intervensi yang bersesuaian;
2. Bekerjasama dengan pihak Persatuan Ibu bapa dan Guru (PIBG) dan Pelibatan Ibu Bapa dan Komuniti (PIBK) untuk membantu mengesan murid yang didapati ponteng sekolah dan berada di luar kawasan sekolah serta memujuk murid hadir ke sekolah;
3. Menjalinkan kerjasama dengan Jabatan Kebajikan Masyarakat (JKM) melalui Jawatankuasa Pasukan Kebajikan Kanak-Kanak oleh JKM yang membantu kebajikan murid-murid yang ada isu berkaitan kemiskinan;
4. Kerjasama dengan Polis Diraja Malaysia (PDRM) menjalankan Program Jom ke Sekolah dengan objektif untuk membantu sekolah membentuk sahsiah diri murid termasuk isu ponteng sekolah; dan
5. Tindakan proaktif sekolah bersama PIBG menjalankan inisiatif kunjung bantu untuk hadir ke rumah murid tersebut dan berusaha memujuk murid untuk hadir ke sekolah.

Bagi membendung masalah keciciran termasuk murid dalam golongan miskin tegar, KPM telah melaksanakan langkah seperti berikut:

1. Memastikan Jawatankuasa Penyiasatan Murid Cicir (JPMC) di peringkat sekolah, PPD dan JPN dikuatkuasakan sepenuhnya. JPMC berperanan mengesan murid cicir dan mengambil tindakan

sewajarnya khususnya golongan miskin tegar di kawasan pedalaman;

2. Melaksanakan Modul Intervensi Murid Berisiko Tinggi Keciciran Serlahkan Keunggulan Diri (Modul SUDI) yang dilaksanakan mulai Mac 2018;
3. Menubuhkan Jawatankuasa Induk Pendekatan Bersepadu Menangani Keciciran Murid di sekolah dan Jawatankuasa Teknikal Pendekatan Bersepadu Menangani Keciciran Murid di Sekolah;
4. Mengeluarkan Surat Pekeliling Ikhtisas KPM Bilangan 4 Tahun 2018 yang mengandungi Garis Panduan Mengurus Murid Berisiko Cicir di Sekolah bagi memastikan semua murid kekal dalam sistem persekolahan sehingga tamat pendidikan rendah dan menengah; dan
5. Menyediakan bantuan khusus yang boleh dinikmati oleh murid dalam kalangan isi rumah B40 (RM3000.00 dan ke bawah) seperti berikut:
 - a. Bantuan Kumpulan Wang Amanah Pelajar Miskin (KWAPM);
 - b. Bantuan Pakaian Seragam Pasukan/Badan Beruniform (BPS);
 - c. Rancangan Makanan Tambahan 1Malaysia (RMT1M);
 - d. Bantuan Awal Persekolahan (BAP);
 - e. Bantuan Makanan Asrama (BMA);
 - f. Elaun Murid Berkeperluan Khas (EMK); dan
 - g. Biasiswa Kecil Persekutuan (BKP).

KPM berpandangan usaha menangani isu ponteng dan keciciran murid akan berjaya dengan sokongan dan bantuan bersepadu oleh semua pihak termasuk pihak ibu bapa, komuniti setempat dan jabatan atau agensi-agensi berkaitan.

Sekian, terima kasih.

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Dr. Azman bin Ismail [Kuala Kedah]

TARIKH : 1 November 2018

SOALAN : Dr. Azman bin Ismail minta MENTERI PERTANIAN DAN INDUSTRI ASAS TANI menyatakan strategi Kementerian untuk meningkatkan hasil pengeluaran padi oleh petani-petani kita. Sejauh manakah kejayaan Kerajaan dalam menubuhkan estet padi.

JAWAPAN

Tuan Yang Dipertua,

Antara strategi Kementerian untuk meningkatkan pengeluaran padi petani-petani seperti berikut:

- (i) memperuntukkan sebanyak RM150 juta di bawah tahun RMKe11 untuk pelaksanaan mekanisasi dan automasi bagi industri padi;
- (ii) pengurusan secara berpusat di bawah Bidang Keberhasilan Utama Ekonomi (NKEA) *Entry Point Projects* (EPP11);
- (iii) pengukuhan infrastruktur pengairan dan saliran bagi Kawasan Pembangunan Pertanian Bersepadu (IADA) di mana sebanyak RM1.395 billion diperuntukkan di bawah RMKe11;

SOALAN NO: 35

- (iv) penggunaan benih padi sah di mana sebanyak RM75 juta diperuntukan pada setiap tahun bagi memastikan benih padi berkualiti dibekalkan kepada pesawah;
- (v) melaksanakan penyelidikan dan pembangunan (R&D) secara berterusan melalui pengenalan kepada varieti benih baru seperti MARDI Siraj 297, MR303, MR 307, UKM RC-2 dan UKM RC-8. Pengenalan varieti baru dapat meningkatkan hasil dan rintang (tahan) kepada penyakit;
- (vi) meningkatkan harga belian padi pada kadar RM1,200 per tan metrik mulai tahun 2014;
- (vii) meningkatkan kecekapan input bagi memastikan peningkatan produktiviti tanaman padi seperti meningkatkan kesuburan tanah melalui *soil profiling*; dan

Penubuhan estet padi di bawah Program NKEA EPP11 telah berjaya meningkatkan hasil pengeluaran padi dengan jumlah hasil 204,157.17 tan metrik berbanding sasaran 200,000 tan metrik pada tahun 2017. Selain itu, Program NKEA EPP11 ini berjaya memberi pendedahan kepada pesawah tentang teknologi baru dalam bidang penanaman padi serta pengalaman pertanian moden.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' ROSOL BIN WAHID
[HULU TERENGGANU]
TARIKH : 01 NOVEMBER 2018 (KHAMIS)

SOALAN NO. 36

Y.B. DATO' ROSOL BIN WAHID [HULU TERENGGANU] minta **MENTERI KEWANGAN** menyatakan rasional bayaran BR1M akan dikurangkan sebelum dimansuhkan, dan apakah langkah-langkah Kerajaan bagi memastikan golongan B40 tidak terbeban dengan keadaan ekonomi semasa yang dikatakan masih tidak stabil dan menyukarkan urusan mereka seharian.

JAWAPAN

Tuan Yang di-Pertua,

1. Bantuan Sara Hidup (BSH) yang dikenali sebagai Bantuan Rakyat 1Malaysia (BR1M) sebelum ini merupakan salah satu bantuan bersasar bagi golongan berpendapatan rendah (B40) untuk meringankan beban sara hidup susulan daripada pelaksanaan rasionalisasi subsidi oleh Kerajaan (harga minyak diapungkan) pada tahun 2012.
2. Kementerian Kewangan dalam peringkat akhir memuktamadkan cadangan penambahbaikan BSH dan beberapa kaedah penstrukturan semula BSH sedang diperhalusi dan dikaji dengan teliti. Di samping itu, penambahbaikan BSH ini juga turut menekankan kerjasama strategik dengan agensi Kerajaan terutamanya Jabatan Kebajikan Masyarakat (JKM), Jabatan Pendaftaran Negara (JPN), Kementerian Luar Negeri (KLN) dan Unit Penyelarasan Pelaksanaan (ICU) untuk mengurangkan ketirisan bantuan serta menangani masalah *inclusion and exclusion error*. Turut dicadangkan di dalam penambahbaikan BSH adalah pembayaran terus 100% ke akaun bank penerima. Bagi penerima yang tiada akaun, pembukaan akaun bank pemohon secara berkelompok berdasarkan persetujuan/akuan pemohon yang akan dimasukkan pada borang permohonan akan dilakukan oleh bank yang terlibat. Maklumat penstrukturan terkini akan diumumkan semasa ucapan Belanjawan 2019 kelak.
3. Untuk makluman Ahli Yang Berhormat, Kerajaan akan memastikan semua bantuan Kerajaan adalah berkesan dan menepati kumpulan sasar yang ditetapkan terutamanya golongan B40. Beberapa program bantuan Kerajaan akan disemak semula dalam konteks menguruskan sistem perlindungan keselamatan sosial yang lebih holistik dan berkesan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 1 NOVEMBER 2018 (KHAMIS)

SOALAN NO.37

Minta **MENTERI PENDIDIKAN** menyatakan berapakah kos yang ditanggung oleh Kerajaan didalam melaksanakan Kontrak Perkhidmatan Membekal Makanan Bermasak Ke Asrama Sekolah-Sekolah di Negeri Sarawak. Adakah sistem ini akan diteruskan pada masa akan datang.

JAWAPAN

Tuan Yang di-Pertua,

Kementerian Pendidikan Malaysia (KPM) mempunyai 185 kontrak perkhidmatan membekal makanan bermasak ke asrama sekolah-sekolah di Sarawak yang sedang berkuatkuasa dengan nilai kontrak berjumlah RM458 juta. Perolehan perkhidmatan membekal makanan bermasak tersebut dilaksanakan secara sebut harga dalam kalangan pembekal yang berdaftar dengan Kementerian Kewangan Malaysia di bawah Kod Bidang Bekalan/ Perkhidmatan 040103 (Makanan Bermasak Islam) yang masih sah dan berkuatkuasa.

Untuk makluman Ahli Yang Berhormat, perkhidmatan membekal makanan bermasak ke asrama sekolah-sekolah akan diteruskan pada masa ini bagi memastikan kebajikan murid-murid menghuni asrama sekolah dari segi kualiti makanan di dewan makan asrama sekolah selaras dengan program pemakanan sihat di bawah Kementerian Kesihatan Malaysia.

Sekian, terima kasih.

RJM79

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

DARIPADA : YB DATO' SERI MAHDZIR BIN KHALID
[PADANG TERAP]

TARIKH : 1 NOVEMBER 2018 (KHAMIS)

SOALAN:

Dato' Seri Mahdzir bin Khalid [Padang Terap] minta **PERDANA MENTERI** menyatakan apakah pendirian Kerajaan terhadap gerakan-gerakan yang memohon agar gejala songsang seperti lesbian, gay, bisexual dan transgender (LGBT) ini diiktiraf dan apakah mekanisma Kerajaan untuk mengekang perkembangan perubahan sistem nilai dalam masyarakat yang didorong dengan slogan Malaysia Baru di bawah Pakatan Harapan.

JAWAPAN : **(YB DATUK SERI DR MUJAHID YUSOF,**
MENTERI DI JABATAN PERDANA MENTERI)

Tuan Yang Di-Pertua,

Berhubung isu Lesbian, Gay, Biseksual, Transgender (LGBT) dan Queer, kerajaan melalui YAB Perdana Menteri telah menegaskan dalam kenyataan beliau pada 21 September 2018, Kerajaan bertegas amalan seperti LGBT tidak akan diterima sama sekali di negara ini. Beliau juga menyatakan konsep kekeluargaan kekal sebagai pasangan lelaki dan wanita yang berkahwin, mempunyai anak, termasuk anak angkat.

Kerajaan sentiasa mengambil maklum mengenai penularan budaya LGBT yang semakin membimbangkan mutakhir ini. Justeru, di Malaysia misalnya memperuntukkan undang-undang sivil berkenaan persetubuhan yang bertentangan dengan aturan tabii di bawah Seksyen

377A Kanun Keseksaan, serta Enakmen Jenayah Syariah Negeri-Negeri berkenaan perlakuan liwat, musahaqah dan orang lelaki berlagak seperti perempuan sebagaimana yang termaktub di dalam Seksyen 25, Seksyen 26 dan Seksyen 28 di dalam Akta Kesalahan Jenayah Syariah (Wilayah-Wilayah Persekutuan) 1997 untuk membendung gejala LGBT ini.

Ia bermaksud, hak komuniti LGBT untuk mengamalkan gaya hidup mereka masih tertakluk dengan undang-undang yang tidak membenarkan di Malaysia. Pada masa yang sama, hak asasi manusia warga negaranya sentiasa dipelihara berdasarkan acuan adat dan budaya di Malaysia serta kerangka Perlembagaan Persekutuan yang meletakkan Islam sebagai agama Persekutuan.

Pada waktu yang sama, Kerajaan menyedari bahawa sikap yang ditunjukkan oleh masyarakat terhadap golongan LGBT, membuatkan mereka lebih jauh tersisih dan akhirnya menjerumuskan mereka ke kancah pekerjaan seks terutamanya golongan transgender. Kajian menunjukkan bahawa golongan transgender dianggarkan berjumlah sekitar 20,000 orang dan hampir 80% daripada mereka terlibat sebagai pekerja seks.

Justeru, Jabatan Kemajuan Islam Malaysia (JAKIM) sebagai agensi agama Islam peringkat Persekutuan telah mengambil inisiatif menyantuni golongan ini dengan melaksanakan aktiviti temuseru (*outreach*) ke kawasan yang dikenalpasti serta mengajak mereka yang beragama Islam menyertai program rawatan dan pemulihan (*'Ilaj wa Syifa'*) secara sukarela iaitu Program Mukhayyam yang telah dilaksanakan semenjak tahun 2011 dengan kerjasama Jabatan Agama Islam Negeri-negeri (JAIN) dan Pertubuhan Bukan Kerajaan (NGO). Selain itu, aktiviti susulan seperti usrah dan kelas pengajian turut dilaksanakan, sebagai suatu bentuk sokongan dan bimbingan yang berterusan (*peer support*) agar kesedaran melakukan perubahan adalah berpanjangan.

Selanjutnya, bantuan zakat al-Riqab sebagaimana yang dipelopori oleh Majlis Agama Islam Selangor adalah contoh yang terbaik untuk diikuti. Bantuan tersebut diberikan melalui perantaraan mana-mana institusi,

pusat, NGO Islam dan individu perseorangan yang dibenarkan oleh undang-undang dan hukum syarak yang berfungsi melaksanakan tugas membebaskan, mengurus, melindungi, merawat dan memulih asnaf al-Riqab yang di antaranya golongan LGBT, sebagai golongan yang terbelenggu dengan gaya hidup songsang dan perlu dibimbing supaya dapat menjalani kehidupan sempurna secara Islam.

Pada waktu yang sama, Kerajaan sedang berbincang dengan beberapa agensi pekerjaan yang mahu memberi peluang pekerjaan yang bersesuaian kepada golongan transgender.

Seterusnya, Program Pendidikan dan Advokasi Berkaitan Isu LGBT berbentuk seminar telah mensasarkan masyarakat awam termasuk pelajar-pelajar sekolah, universiti awam dan swasta (UA/US), kaunselor sekolah/UA/US, ibu bapa, sukarelawan sosial Islam, staf kesihatan dan wakil NGO sosial Islam. Seminar ini akan membincangkan isu LGBT dari aspek psikososial, psikologikal, psikospiritual dan kesihatan agar peserta mendapat maklumat dan kemahiran yang tepat bagi menghindari perlakuan LGBT serta membantu golongan yang terlibat untuk meninggalkan perlakuan LGBT. Sebagai rujukan dan panduan, JAKIM juga telah menerbitkan *e-book* Panduan Hijrah Diri bagi mereka yang mengalami permasalahan homoseksualiti yang boleh dimuat turun di *Google Playstore*, buku “Hadith Sahih Berkenaan Perlakuan LGBT” serta risalah “Memahami LGBT daripada Perspektif Seorang Muslim”.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA DR. MAXIMUS
JOHNITY ONGKILI [KOTA MARUDU]**

TARIKH : 1 NOVEMBER 2018 (KHAMIS)

SOALAN NO.39

Minta **MENTERI PENDIDIKAN** menyatakan apakah status terkini program pembaikan dan pembinaan semula sekolah-sekolah daif di Sabah dan Sarawak di bawah peruntukan khas RM1.0 bilion. Berapa jumlah sekolah-sekolah yang telah siap bagi setiap negeri dan berapa jumlah peruntukan telah diguna pakai.

JAWAPAN

Tuan Yang di-Pertua,

Melalui pembentangan Bajet 2018, Kerajaan yang lalu telah meluluskan peruntukan sebanyak RM1 billion untuk memperbaiki sekolah daif bagi tahun 2018 hingga 2019 menggunakan peruntukan *Private Financing Initiative* 2A (PFI 2A) bagi Negeri Sarawak dan RM1 billion untuk Negeri Sabah. Bagi tahun 2018, Sarawak dan Sabah masing-masing diperuntukkan RM500 juta.

Pada untuk tahun 2018, sebanyak 116 projek sekolah daif dilaksanakan di Sarawak. Daripada jumlah tersebut, 64 projek telah siap manakala baki 52 projek sedang dalam pelaksanaan. Sehingga kini jumlah tuntutan yang telah dibayar untuk projek sekolah daif di Sarawak ialah sebanyak RM133.951 juta tertakluk kepada kemajuan projek.

Bagi projek di negeri Sabah pula, pada untuk tahun 2018, sebanyak 120 projek sekolah daif dilaksanakan. Daripada jumlah tersebut sebanyak 100 projek telah siap manakala baki 20 projek sedang dalam pelaksanaan. Sehingga kini, jumlah tuntutan yang telah dibayar untuk projek sekolah daif di Sabah ialah sebanyak RM193.519 juta tertakluk kepada kemajuan projek.

Sekian, terima kasih.

RJM80

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI
BIN HAJI SALLEH [PASIR PUTEH]**

TARIKH : 1 NOVEMBER 2018 (KHAMIS)

SOALAN NO.40

Minta **MENTERI PENDIDIKAN** menyatakan adakah pihak Kementerian akan meneruskan janji manifesto untuk memansuhkan Akta Universiti dan Kolej Universiti (AUKU) yang mana banyaknya melibatkan urusan tadbir sesebuah institusi pendidikan tinggi berbanding sekatan terhadap kebebasan mahasiswa bersuara serta apakah cadangan gantian terhadap AUKU dalam meletakkan satu garis panduan standard untuk semua IPT.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah mengadakan sesi *facts finding* secara berterusan bersama pemegang taruh iaitu pengurusan tertinggi universiti awam, staf akademik, alumni, wakil persatuan kakitangan akademik, penasihat undang-undang dan orang awam untuk melihat persepsi dan kesediaan untuk memansuhkan atau meminda AUKU.

KPM telah menubuhkan empat Jawatankuasa Kerja yang berperanan untuk menyediakan input atau draf kandungan baru AUKU dan menyelaras laporan berkala dan pembentangan kepada Jawatankuasa

Teknikal Pelaksanaan Pemansuhan atau Pindaan AUKU. Jawatankuasa Teknikal akan menyelaras, mengkaji dan menyemak peruntukan berkaitan yang terdapat dalam AUKU secara menyeluruh dan kemudiannya mengemukakan cadangan kepada Jawatankuasa Induk. Kesemua ahli Jawatankuasa ini dianggotai oleh ahli akademik, bukan akademik, penasihat undang-undang, wakil pelajar dan wakil persatuan yang merupakan pemegang taruh universiti awam dan swasta.

Bagi pelaksanaan jangka pendek (quick win), KPM telah bersetuju untuk membatalkan peruntukan yang menghalang pelajar terlibat dalam aktiviti parti politik di dalam kampus (Seksyen 15(2)(c) Akta Universiti Dan Kolej Universiti 1971 [Akta 30]) yang dijangka dibentangkan di Parlimen pada sesi Disember 2018.

Pindaan AUKU ini dilaksanakan bersekali dengan Akta Institusi Pendidikan Tinggi Swasta 1996 [Akta 555] dan Akta Institusi-Institusi Pelajaran (Tatatertib) 1976 [Akta 174] yang mempunyai peruntukan sama terpakai kepada Institusi Pendidikan Tinggi Swasta, Politeknik, Kolej Komuniti dan Institut Perguruan Malaysia.

KPM juga telah menyediakan pelan perancangan jangka masa panjang bagi tujuan pelaksanaan pemansuhan AUKU dimana ia dijangka akan selesai menjelang penghujung tahun 2020. Perancangan tersebut turut melibatkan kesemua akta yang berkaitan dengan pendidikan tinggi.

Sekian, terima kasih.

RJM81

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI IKMAL HISHAM BIN
ABDUL AZIZ
[TANAH MERAH]**

TARIKH SOALAN : 1 NOVEMBER 2018

SOALAN NO.41

minta **MENTERI PEMBANGUNAN USAHAWAN** menyatakan apakah program atau bentuk bantuan kepada golongan usahawan Bumiputera berikutan keputusan Kementerian untuk mengurangkan segala bentuk peruntukan mahupun geran percuma kepada golongan tersebut.

JAWAPAN

Tuan Yang Dipertua,

Pengurangan bantuan kewangan dan geran percuma tidak bermakna Kerajaan meminggirkan golongan usahawan Bumiputera di negara ini. Bantuan kewangan dan geran masih akan diberi, cuma ia akan lebih melibatkan kumpulan sasar yang benar-benar memerlukan dan mempunyai merit. Ini adalah bagi mengurangkan kebergantungan terhadap Kerajaan dan bertujuan melahirkan usahawan-usahawan yang lebih berdaya saing dan berani menghadapi risiko untuk membangunkan perniagaan masing-masing.

Kerajaan akan terus membantu usahawan Bumiputera terutamanya daripada segi pembangunan kapasiti, melalui antara lain program *coaching* dan *mentoring* dengan memadankan usahawan-usahawan Bumiputera yang baharu bertapak di bawah seliaan usahawan Bumiputera yang telah berjaya supaya mereka dapat mempelajari teknik dan selok-belok perniagaan dan dapat membina keyakinan dalam menjalankan perusahaan.

Kementerian juga akan meneruskan program-program pembangunan usahawan Bumiputera yang dilaksanakan melalui agensi-agensi seperti Perbadanan Usahawan Nasional Berhad (PUNB) dan TEKUN.

Sekian, terima kasih.

.....

SOALAN NO. : 42

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI WAN JUNAIDI BIN TUANKU
JAAFAR [SANTUBONG]**

TARIKH : 1 NOVEMBER 2018

SOALAN NO. 42

Dato' Sri Dr. Haji Wan Junaidi bin Tuanku Jaafar [Santubong] minta **MENTERI AIR, TANAH DAN SUMBER ASLI** menyatakan sama ada Kerajaan akan meneruskan perancangan projek-projek Tebatan Banjir Sungai Golok Kelantan RM560 juta, Sg. Pinang, Pulau Pinang RM150 juta, Bandar Sibul, Sarawak RM100 juta dan Bandar Kuching, Sarawak RM150 juta diteruskan, kalau tidak kenapa, kalau ia bila, hendak dilaksanakan dan adakah penambahan atau pengurangan kos berlaku kepada projek-projek tersebut.

JAWAPAN:

Tuan Yang di-Pertua,

- 1) Pembangunan Lembangan Sungai Bersepadu (PLSB) Sungai Golok Fasa 1 (kos projek yang diluluskan dalam RMKe-11 adalah RM300 juta) diteruskan dan kerja-kerja pembinaan telah bermula pada 23 April 2018 dan di jangka siap pada 22 April 2022.
- 2) Rancangan Tebatan Banjir (RTB) Lembangan Sungai Pinang (kos projek yang diluluskan dalam RMKe-11 adalah RM150 juta) diteruskan dan pada masa ini masih di peringkat perancangan dan reka bentuk. Kerja-kerja pembinaan dijangka bermula pada tahun 2019.
- 3) RTB Sibu Fasa 3 (kos projek yang diluluskan dalam RMKe-11 adalah RM100 juta) diteruskan dan projek ini telah ditawarkan dan sedang dalam penyediaan reka bentuk.
- 4) Projek Pembangunan Lembangan Sungai Bersepadu Sungai Sarawak (kos projek yang diluluskan dalam RMke-11 adalah RM150 juta dan tambahan kos bagi pengambilan tanah adalah RM41 juta menjadikan kos keseluruhan RM191 juta) diteruskan dan pelaksanaannya ditangguhkan ke tahun 2019 seperti diputuskan oleh pihak Kerajaan.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA
PARLIMEN KEEMPAT BELAS
MAJLIS MESYUARAT DEWAN RAKYAT
15 OKTOBER HINGGA 11 DISEMBER 2018

PERTANYAAN : LISAN

DARIPADA : DATO' SERI DR. AHMAD ZAHID BIN HAMIDI
[BAGAN DATUK]

TARIKH : 1 NOVEMBER 2018 (KHAMIS)

SOALAN :

minta **MENTERI INDUSTRI UTAMA** menyatakan adakah hasil lawatan Perdana Menteri ke China baru-baru ini telah berjaya meningkatkan permintaan eksport minyak kelapa sawit dan getah Malaysia ke negara tersebut.

JAWAPAN :

Tuan Yang di-Pertua,

Untuk makluman Ahli Yang Berhormat, pertemuan di antara Kerajaan Malaysia dengan China semasa lawatan YAB Perdana Menteri pada bulan Ogos yang lalu telah mengukuhkan lagi hubungan dua hala di antara Kerajaan Malaysia dan Kerajaan China. Beberapa perkara telah dipersetujui semasa pertemuan tersebut antaranya adalah persetujuan negara China untuk meningkatkan import minyak sawit dari Malaysia sebanyak 500,000 tan dan Kementerian bersama-sama Kementerian Perdagangan Republik Rakyat China (MOFCOM) sedang membincangkan langkah-langkah untuk meningkatkan jumlah import minyak sawit dari Malaysia ke Negara China.

Selain itu, tiga memorandum persefahaman (MoU) telah ditandatangani dalam usaha meningkatkan permintaan eksport minyak sawit dan getah asli seperti berikut:

- i. Lembaga Minyak Sawit Malaysia (MPOB) dan Universiti Tsinghua telah menandatangani MoU mengenai Pembangunan Teknikal dan Promosi biobahan api sawit Malaysia. MoU ini membolehkan MPOB memulakan kajian perintis dengan kerjasama Universiti Tsinghua mengenai biobahan api berasaskan sawit dalam bidang pengangkutan (darat, marin dan penerbangan), bekalan haba dan bekalan tenaga untuk industri di China;
- ii. Sime Darby Plantation Berhad telah menandatangani MoU dengan syarikat pembekal minyak dan bijirin terkemuka milik negara China iaitu *COFCO Group Co. Ltd.* (COFCO) untuk mewujudkan kerjasama baharu mengenai aplikasi hiliran minyak kelapa sawit dan produk berkaitannya. MoU ini termasuk penyelidikan bersama mengenai manfaat kesihatan minyak sawit, membangunkan keupayaan untuk mengeluarkan minyak sayuran khusus (*specialty fats*) dan mewujudkan aktiviti jualan dan pemasaran bersama untuk mempromosikan produk sawit yang dinilai tambah di China; dan

- iii. Lembaga Getah Malaysia (LGM) telah menandatangani MoU dengan *Hainan State Farms Bureau* dan *Hainan State Farms Investment Holdings Group Co. Ltd* (HSF). Perjanjian MoU ini adalah mengenai kerjasama dalam teknologi pembinaan jalan raya dengan menggunakan campuran bitumen dan getah beku (*cuplumps modified bitumen* (CMB)) dan teknologi mesin penorehan getah automatik. Pihak HSF dengan kerjasama LGM akan melaksanakan projek pembinaan jalan raya dengan menggunakan teknologi CMB di Hainan, China pada suku tahun pertama 2019 dengan ujian awal dianggarkan sepanjang 200 km.

Dengan persetujuan MoU-MoU ini, pihak Kerajaan yakin bahawa ianya akan mampu meningkatkan permintaan eksport minyak sawit dan getah Malaysia ke negara China.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI MUKHRIZ
TUN DR. MAHATHIR
[JERLUN]**

TARIKH : 1 NOVEMBER 2018 (KHAMIS)

SOALAN NO. 44

Minta **MENTERI PERUMAHAN DAN KERAJAAN TEMPATAN** menyatakan tindakan yang telah diambil oleh Kerajaan Persekutuan untuk membantu lebih ramai rakyat berpendapatan rendah dan sederhana memiliki rumah kediaman, sesuai dengan dasar Satu Keluarga Satu Rumah.

JAWAPAN

Yang di-Pertua,

1. Untuk makluman Yang Berhormat, bagi membantu rakyat terutamanya golongan berpendapatan sederhana (M40) dan rendah (B40) memiliki kediaman, Kerajaan telah melaksanakan inisiatif Rumah Mampu Milik dan merangka beberapa inisiatif baharu bagi meningkatkan tahap kemampuan pemilikan rumah.
2. Antara langkah yang diambil oleh Kementerian Perumahan dan Kerajaan Tempatan (KPKT) adalah melalui pelaksanaan Dasar Perumahan Negara 2018 – 2025 iaitu:
 - (i) Melaksanakan rasionalisasi Entiti Tunggal Perumahan Negara melalui perpindahan agensi penyedia perumahan awam Kerajaan dan mampu milik ke KPKT supaya perancangan untuk perumahan mampu milik dilaksanakan dengan teratur dan dapat memenuhi kemampuan pemilikan rumah mengikut kumpulan sasaran;
 - (ii) Menentukan kategori harga Rumah Mampu Milik berdasarkan ukuran kemampuan median pendapatan isi rumah mengikut kawasan dan negeri;
 - (iii) Menyediakan peruntukan khas untuk meningkatkan pembangunan rumah bersubsidi Kerajaan seperti Program Perumahan Rakyat (PPR);
 - (iv) Meningkatkan penyediaan Rumah Mampu Milik melalui kerjasama dengan pemaju swasta secara *cross-subsidy* iaitu penyediaan tanah oleh Kerajaan dan pembinaan dilaksanakan oleh pemaju swasta;

- (v) Memperluaskan pilihan perumahan melalui formalisasi pasaran sewa untuk memenuhi keperluan masyarakat yang pelbagai melalui kajian dan penggubalan Akta Sewa Rumah Kediaman.
- (vi) Menambah baik skim pembiayaan perumahan sedia ada untuk menyediakan penyelesaian inklusif serta mampan bagi kumpulan M40 dan B40 dalam meningkatkan akses rumah mampu huni iaitu melalui kaedah-kaedah:
 - (a) *Top-Up Fund* – bantuan pinjaman perumahan sebanyak 10% daripada harga rumah yang dibeli dengan kadar faedah 2% selama tempoh pinjaman selama 15 tahun; pinjaman pembiayaan perumahan daripada institusi kewangan swasta sebanyak 80% daripada harga rumah dan deposit pembeli sebanyak 10%;
 - (b) Skim Pembiayaan Kewangan Fleksi dan *Subsidised* dengan kerjasama Bank Negara Malaysia (BNM) untuk menyediakan tempoh pinjaman jangka masa yang lebih panjang, kos kemasukan yang rendah serta kadar faedah yang lebih rendah daripada kadar biasa; dan
 - (c) Menyediakan skim perumahan khas melalui kerjasama dengan pemaju swasta.

Kesimpulannya, langkah-langkah ini sedang dan akan dilaksanakan oleh Kerajaan bagi membantu memastikan setiap rakyat terutamanya golongan berpendapatan sederhana dan rendah memiliki rumah sendiri.

sekian, terima kasih.